

BATENA NIHAJU ...

Anjamaya Butta

Dahlan, September 1987

Nakupammulaimo bica'-bicaranna a'sarupu'a, battuangna anjamaya butta. Nomoro se're iamiintu parakarana a'lamunga batara. Punna narapi'mi bulang karua sangenna bulang salapang, bulang sampulo, timoromi. Jari injo taua ri Herlang, ri Kajang angngokka'i, sanggenna narapi' bulang sampulo se're.

Injo tau angngokka'a gassingi rie' nikua a'rera' iareka a'leleang, battuangna a'se'rei angngokka' rua, tallu, appa' sanggenna sampulo labbi. Battuangna injo punna maengi angngokka' ri kokonna inni aloa, ammuko ri kokonna isse' urangna angngokka' sanggenna tammu massing maeng nataba leleang.

Injo punna angngokka'ki battuangna se're injo jama-jamaang punna anre' kibiasa ta'lalo hattala'na, mingka ri sesena injo nikuaya pasarupu', pajama butta, ringangi pa'kasia'na.

Jari punna ganna'mi tallung bulang angngokka', e, a'tajangmi bosi. Punna a'pakarammula turung bosia sitangnga taua lamungmi nuesoa kokonna, mingka sitangnga taua injo nampami nikua ammuara. Injo nikuaya ammuara iamintu tau rie' tedongna, nampami nanangkala kokonna. Punna nuanre'ja nalohe ruku'na nakua kaleja nahuurai, mingka punna nulohe ruku'na nikua nabukka'i, sanggenna napinruangi.

Maengpi injo napinruangi nanampa nakalorang, e, nalamungimi. Injo tau angngokka'a, punna ganna'mi pinruang turung bosia, iareka pintallung turung bosia nilamungi to'mi. Batena a'lamung iamintu punna okka' niasi'i iamintu kaju nitatasa nampa nikali'-kalibbonggang injo mange nanampa nilamungi batara.

Injo punna a'lamungki batara ta'se're kalibbong sanggenna. Injo ta'se'rea kalibbong biasa to'i nipasilaung bataraya injo siurangang bue. Jari punna lompo bataraya timboi injo bataraya a'timbo to'mi raung bue.

Jari pakuami injo bica'-bicaranna injo angngokka'a siurangang a'nangkalaya.

Punna maengmi nilamungi injo taua anua nahojai nuanre'a na'timbo. Punna lohe anre' na'timbo nikua nasa'lakii, battuangna nilamungii pole.

Nomoro rua injo sumpae' tau a'nangkalaya punna maengmi nilamungi nikalorang na nilamungi nalohe todo' tangnga timbo inni sa'laki to'i. Rie' todo' tau nakua nisu'lakii, rie' todo' tau nakua nisa'lakii.

Punna anrohe-rohemni, battuangna pakarammula injo ganna' appa' limang lahara raungna, injo pasangko, battuangna tau angngokka'a nannyankoja, nabajami batara'na.

Injo punna nabaja nasangkoi, napela'ji ruku'na nampa nahumbung pok'o'na injo bataraya butta. Injo tau a'nangkalaya nikua nanangkalai alla'na batara'na, nanangkalai sa'la'na.

Jari riekija jama-jamaangna injo taua a'lamungaya, iamintu nikua ammaungii. Punna maengmi injo kira-kira ruang bulang, ia riolo ri hattungku a'kokojja, punna ganna'mi tuju pulo bangngi maengna nilamung bataraya, e, nikanremi.

Injo punna pakarammula nikanre bataraya, punna nikua angnganreki batara lolo rie' nikua kalapikai. Mingka injo nikuaya kalapika sitoje'-toje'na anre' nataba ba'lalo injo ri sesena nikuaya agama. Mingka ada' riolo injo kalapikai. Iami intu punna pakarammula nikanre bataraya a'tunui jangang nampa a'bajui injo bataraya nisongkoli, nisossolo, nampa nikukusu iareka na nilappa'-lappa', nanampa nilabbiang injo ri tangngana kokoa, nilabbiang ri appa' kacucunna injo kokoa. Rie' todo' injo ri balla'a nipakua todo', injo sitoje'-toje'na anre' nata'lalo sirattang ri sesena nikuaya agama. Jari kunni-kunnina kulle kapang punna rie' pale' anggaukangi injo anre'mo

nalohe ba'lalo. Kulle kapang siminguu rua minggu taua angnganre batara lolo, kalotoromi.

Jari nikeo'mi isse' tau lamunga riolo mange annyappe. Injo punna nisappemi, injo bahinea annyappea, natambung kaleji kunjo mange ri kokoa. Jari battu inni buru'nea mange allalingi, nailembara mange ri balla' iareka na nateke'. Napantama' ri pammantangangna iamintu nikua galampang. Punna tau lohe batara'na napa'bajuangi galampang, punna tau anre'a nalohe batara'na, e, kunjo injo ri siringa mange nisappe. Jari punna bangngi injo nipayeli injo bataraya injo nucaddi-caddia na nulompoa nipasisala'. Injo nucaddi-caddia nikua burinsing. Jari kunjomini injo biasa rie' pasiitteang antara tulolo na ana' buru'ne. Punna bangngi nikua ammibbi' burinsing, a'baru'-baruga arengna.

Na punna maeng ngase'mo nisappe bataraya, a'keo'maki tau annattaki riolo inni. Injo nikuaya annattaki, battuangna nitatta' injo dongkengna bataraya, a'keo' to'i taua, injo buru'-buru'nea anre'ja nikeo'i. Inniji bahi'-bahinea nikeo', tau lanrangkasa arengna. Rie' to' injo pasikkiri iareka napakelong.

A, battu ngase'mi inni ana'-ana' buru'nea manna tangnga nikeo' ia battu ngase'i, battu annattaki na a'ra'na to'ji, rie' a'sikkiri, rie' a'kelong, na iami injo narie' ngase'mo ana'-ana' buru'nea battu annattaki. Injo tau lohea batara'na biasai rua tallu bangngi annattaki. Punna nusikiddija batara'na anre'ja nakeo'i taua annattaki, ia to'ji anta'-tatta'i. Punna maeng injo napanai' to'mi ri paranna.

Jari kamuami injo cari'-carita singka ha nikuaya a'lamunga batara.

A'lamunga pare

Dahlan, September 1987

Jari kupalette' isse' cari'-caritanna injo sumpae' pasarupu'a mange ri pa'sala'na a'lamunga pare. Injo a'lamunga pare, ruang buangangi.

Rie' nikua pare dara', battuangna pare nilamunga ri kokoa, rie' nikua pare galung iamintu nunilamunga ri galunga. Jari inni na kucari'-caritaya rolo' iamintu a'lamunga pare dara'. Kulle kapang kamua injo mae punna maengi tau annyappe na antama'mo bulang appa', pakarammulami a'bukka' ttau injo pa'lamungang pare dara', battuangna inni punna koko pakarammulami ninangkala. Punna nuanre'ja nalohe anunna, numaeng nilamungi batara nisangko kaleji.

Na punna narapi'mi bulang appa' battuangna lalabbusumi bulang appa' injo, nitahurumi injo lamungang parea nanampa nisembo'.

Jari batena injo a'lamung rie' nuniasa' rie' nunitahuru kaleji. Inni kunni nisembo', battuangna nitambungi. Punna nuluara biasai kuitte nahaju pannambungi injo, punna nuninangkala injo kokoa, e, raung kaluku nasaha' jari katambungang injo parea ianna nakanrei bukkuru.

Jari kamua injo mae bulang karua iareka bulang salapang nikattomi injo pare dara'a. Jari amminroa ia isse' mae nikuya pare galung.

Injo anjamaya galung ri anre'napa injo a'lamunga pare galung, labbi rioloi batena ttau anjama galung. Uru-uruna iami intu nibukka'i injo galunga battuangna ninangkalai. Injo tau anjamaya galung ruai, rie' nikua anjama tedong, rie' todo' nikua anjama tau. Naia anjama tedonga jama-jamaang'na iamintu a'nangkala. Na iaji nikuya anjama tau, punna maengmi ninangkala, nibukka', nabukka' nabingkung injo biringna deppo'a, a'tammu. Jari antere'-antere' injo nasala a'nangkala, nabingkungi.

Nampa punna maengmi nabukka' siallo ruang allo ninangkalai pole, nakua nirota'i. Injo tau anjama tedonga a'nangkalai pole. Jari injo tau anjama ttau punna nirota'i a'deppo'i, battuangna natambungi injo deppo'a, naherui injo deppo'a ianna a'lolori erea, nammantang erea injo battuangna.

Jari punna maengmi injo nakalotoromo deppo'na, inni pajama tedonga a'pakarammula pole anjama nikua a'pakaesoi. Injo nikua a'pakaeso tallu buangang inni, nomoro se're injo nikua salaga, nomoro rua esara, nomoro tallu pugu. Lapadaji salaga mingka nubodo-bodo giginna, nikua pugu. Injo nikua esara nuanre'ja giginna, mingka injo nikua salaga nulabbu giginna. Iami nipake pakaeso, sollanna injo galunga nalappara, battuangna anre' natabbing.

Punna maengmi injo nipakaeso, nagassing lohe ruku'na kaitteang, e, nikua isse' nitaronjo'i.

Punna maengmi injo, injo bahi'-bahinea punna pakaesomaki, anre'i nupammulai inni sumpae' inni ri hattunna a'panaung tau bine. Jari lamminroa rolo' mange ancaritai inni a'panaunga bine nasaba' inni galunga esomi. Jari injo rie'mi rolo' sanggennaya.

Jari injo punna bungasa kipanaung bine uru-uruna injo parea nitaro rate mae ri paraya nikua niiri'i, battuangna nipasalai ri dongkengna, ri aroasa'na, nilisa' bangkeng injo nata'sala ngase' injo unang ngase' injo lisere'na parea ri dongkenga, nampa nitapi.

Maengi injo nipa'rappungang nipantama' ri baku', biasa injo kuitte punna la'panaungki bine nierang ngase' injo mange bajung binea ri pok'o' benteng tangngaya nipanaung. Jari punna bangngii punna ammuko nanipanaung injo binea na nitahuru injo binea, e, nitunui injo sulo sapiri punna bangngii, e, rie' to' injo acarana, biasa ttau angnganre-nganre injo bangngia, battuangna ia, nurie'a. Jari injo ri sesena tau battuangna injo nuanre'a nasirattang ri agamaya, punna kalokko'ji injo a'pusu'na sulonna, e, nakuamo: "Lajariji parea," mingka punna lambusu nai' nakua: "O laopai."

Jari punna injo pa'panaungang binea ruang buangang to'i. Biasai kunjoja ri galunga nipanaung, pada kunni-kunni kuitte loheangangmi kunjomo ri galunga nipanaung binea, biasa to'i kunjo ri kokoa nipa'bajuang pa'bineaeng. Na punna maengmi nitahuru nisembo'mi nitambungi.

Kulle kapang sihulang labbi punna narapi'mi injo ka maengmi inni nipakatimbo inni sumpae'. Kupainro inni sumpae' ri hattunna maengmo nipakaeso galunga, a'keo'maki bahi'-bahine inni nikua anrembu'. Mangemi inni bahi'-bahine a'keo'maki bahi'-bahine inni nikua anrembu', battuangna ammubbu' inni bine, nupare timboa injo nahubbu', nampa nisekko'-sekko'. Punna maengmi injo nisekko'-sekko' nilalingmi a'lampa ri galunga, nitatta' rolo' cappa'na injo rate nikarrisi injo ilalangna *ilmu pertanian* sollanna injo anre' nalohe ba'lalo pangngisokang ere, jari nipela'i raungna sitangnga. Mingka injo ri sesena pagalunga ka anre' naisse' injo matu-matuna injo, ia kaleji injo nikua nakarrisii naballo niitte.

Punna battumi ri galunga nitanangmi injo batena ttau a'tanang riolo, ammono' bokoi. Iamintu nikua *amunduru* tau a'tananga pare, nasaba' a'dakka boko ttau punna a'tanangi, punna a'lamungki pare injo. Injo gitte rate kunre mae ri Hero siurangang ri Kajang anre'ja nama'ring bahineapa a'tanang, buru'neaji. Injo punna tanangi ttau biasa to'i a'keo' tau a'tanang, battuangna rua tallu ambalii tau a'tanang, biasa to'i a'leleang. Punna molemi tanangna a'pakarammulami injo nihaja-hoja erena, punna lohe ruku'na nikanrappo'i, nibajai, maeng injo nilisa' ruku'na injo naung ri tanaya naung nitambungi pota'. Mingka punna angnganre balahoa, biasai

nakanre balaho punna kurangi erena. Nipakaesa'i erena nitambungi injo sappana galunga sollanna nalohe erena, nanampa nipela' injo nunakanrea balaho. Biasa to'i punna baja'ki pare injo rie' nikua nakanrei olo', battuangna injo mate pucu'na injo anua, rie' olo' iraha a'r'u'mung, na ia injo biasa ammanraki pare.

Mingka kunni-kunni anre'mo, sagalami napanraki nasaba' rie'mo racung, racung olo'. Rie' to'mo racung balaho, manna injo loheja pare nakanre balaho. Jari a'keo'i taua tu'kanrappo' anrengna iareka a'leleangi kanrappo'.

Punna ambuami parea anre'mo na'kulle nitaba-taba punna a'pakarammula ambua, nasaba' injo punna nitaba-tabai aunangi bunganna, jari anre' najari parea. Injo sitangnga taua nukaddoroija ri bida'a, biasai mange naiti'-itiki parennna injo biasai a'keo' tuto'-tutoa, tau biasa mange naiti'-itiki parennna punna karahie' punna pakarammula injo ansuluki parea.

Sanggenna kulle kapang narapi' bulang sampulo nikattomi. Injo punna kattoki punna nuanre'ja nalohe, kale-kalenna to'ji katto injo mange, iamintu tau rembu'a injo sumpae' nikeo' a'katto. Biasa to'i rie' tau battu angngera katoang, nikeo' to' a'katto. Rie' to' nikua katto sima, battuangna a'kattoi nanampa punna ganna'i limang teteng nakatto nipayansulu'i siteteng, battuangna nisareangi tau kattoa siteteng, iami injo nikua katto sima. Mingka kunni-kunni anre'mo tau katto, tau sangki mami, nasaba' anre'mo pare butere, riolo nu'butere parea.

Jari injo riolo punna a'kattoi taua biasa to'i rie' nikua a'keo' tau katto, nikua a'pauluangi iamintu a'keo' injo mae tulo'-tulolo ri ampi'-ampi'na tau kattoa namange a'katto. Jari inni buru'-buru'ne rie'mo isse' pasiitteangna buru'-buru'ne siurangang bahi'-bahinea, e, mange to'i nikua allele. Jari punna barrisimi injo tau kattoa a'jijirimi injo mange tulo'-tuloloa iareka bahi'-bahinea injo a'katto, battumi inni ri boko buru'-buru'ne allele. Injo punna lanaerai injo numaenga nakatto nakua kaleja sape. Punna lantemi injo kunjo naisse' to'mi injo angkua naerami injo jari nisareangi. Biasai injo kodong bahi'-bahinea nampami ta'tallung butere ta'patang butere, lima butere maeng nakatto rie'mo isse' battu angngera jari nisareangmi isse'. Injo punna nisareangi anre' na'kulle sitaba limanna bahinea injo sumpae' nu'kattoa na injo buru'ne nullelea, niare'i se're pa'pirangga. Jari injo tau lelea sumpae' inni ri bokoangna inni tau kattoa, biasa to'i a'kelong, battuangna injo kelongna napitujui injo tau kattoa.

Contona: Punna nierai tetengna naanre'pa nisareangi ka ia biasa anre'pa nalohe nakatto ri limanna naera battumo nikelongimi angkua; "Mallingma inni ammentengi ri tujunna simbolengta, tabe' sombangku, kisareangma tetengta."

Iareka na nakua; "Kipelakangma raungna, kipelakang kola'-kola'na, parilimangku, parikarameng caddiku." E, nampami injo nisareang.

Punna nisareangi injo pale' nisikali site'ro limanna iareka sitoleang limanna a'kelongmi pole pa'pada angngera popporo angkuaya: "Punna kutaba limanta tea mamaki larroi, lima siana' karameng sompo sikali."

Napakuami injo sanggenna ta'siallo bujuru injo, battuangna punna ta'lesangi alloa tau pa'keo' injo sanggenna karahie'. Injo tau maea allele, tau maea nikatto injo na a'ra'na to'ji battuangna anre' nanisare assele, battuangna anre' nigajii, na a'ra'na to'ji. Iaji injo punna nitoanai, battuangna nisare peta', iareka na nisare kanre.

Jari injo tau kattoa punna nulompo butere'na nikua nipa'buterei, mingka punna nucaddi-caddija nikua nikattungi. Iami injo biasa nibone ri baku', injo nunipa'buterea nisekko'i. Jari punna ri galunga nisekko' rie' todo' nikua punna nisekko' injo biasa nikua ta'patang teteng ta'tallung teteng nipasisekko' antama' nikua nikaharrangi.

Injo nikaharranga rie' to'i injo se're tau macca injo a'kaharrang, anre' na iangase' taua macca a'kaharrang, rie' to' tau macca. E, tulolo to' injo biasa ampannempaiangi, battuangna injo nisare ta'siteteng-ta'siteteng injo na nipayansulu-labbuiang memang nampa nisareang, nampa nasekko'. Nunapalangga injo ri tera'-terasa'na injo parea, nampa bangkengna sihali injo a'tu'rang injo pa'sekko'na nikua tudduang, tulu' injo iareka na uhe nihaju nikua tudduang. A, Injo nikuaya pa'kaharrang, battuangna pa'sekko'na injo, parring lolo nihaju iareka na arisi, battuangna beru, bukkulengna injo berua nikua arisi. Na punna karahie'mi nilalingmi a'lampa ri balla'a. Injo kattunga nierang to'mi amminro ri balla'a. Punna hambahgi alloa nialloii, jari punna bangngii nidengkami. Injo sumpae' tau a'kattoa injo tau anrembu'a injo naanjari pakatto pole, punna bangngii a'dengkai injo kattung. Na iami injo kattunga biasa nikanre punna allo nikanre-kanre, nikua to'ja angnganre-nganreki kattung. Battuangna injo kanreji mingka pare lolo battuangna, pare beru nihaju.

Ia punna a'dengkaki biasa to' injo rie' ana' buru'ne battu ambali-baliki, punna bangngi nikua a'padengkai. Mingka injo se're gau' battuangna lassiri sikaliki injo angnguppa angkua bicara tangnga annaba. Jari anre'mi injo nasanna'mo nigaukang.

Jari punna maengmi sumpae' inni nikaharrang maeng nialloi narangkomo, nipanai'mi ri paraya. Injo lingu'ngu'na punna maengmo nipayansulukang, injo tau kattoa nierangangmi a'lampa ri balla'na, nitekekang. Inai teke'i iami intu patanna galung sumpae' antekkangi mange tau kattonna. Biasai roa', battuangna injo ilalangna inni anua biasa rie' anjari, injo punna keo'ki riolo parembu', a'keo'ki pakatto biasa injo tulolo nikeo'a anu annaba-nabaya ri nyahata.

Jari biasai injo punna nierangmi amminro pakattoa, battuangna pinahang injo bicara haji', sanggenna anjarimo se're, battuangna kalabbusangna se're bija. Jari kunjomi injo sanggenna mangena injo lamunga pare kucarita nari bokopi isse' na kusambungii.

Punna Hattu Pa'galung Su'rung Nikanre Assele'na

nicarita ri Hamsia ana'na Cicu', Jannaya, 1986

Punna la'galungki, kunjo mae ri labbia sihulang a'nangkala memangki rolo' pa'bineang. Punna maengi ninangkalamo injo pa'bineanga, nialle nirangkasa ruku'na injo nu'balengkanga nialle nipahosara nahaji' nitahuri.

Jari punna maengi nitahuri pare niallemi nisembo' ianna ammanyu' parea punna battu bosi sarroa, na ianna to' pole nakanre dongi' iareka bukkuru.

Jari kunjo mae sitangnga hulang binea naungmaki ri galung. Punna bungasaki a'galung nialle rolo' nibukka', nampa punna maengi nibukka' nibingkungi bangkengna deppo'a. Punna maengi nibingkungmo bangkengna injo deppo'a niallemi nipota', maengi nipota' nideppo'mi. Jari maengi injo nipugumi su'rung aeso injo galunga.

Punna aeso injo galungamo suro anrembu'maki. Punna maengi injo nirembu' binea niallemi nitanang. Injo punna a'tanangki biasaki a'pa'keo'. Jari rie' tau a'taronjo' ri dallekang, rie' to' tau a'tanang ri bokoang a'su'rung maeng.

Jari kunjo mae sihulang maengna nitanang niallemi nibaja, nanampa niraung mate (nikanra'masa).

Punna ganna'mi patang bulang parea iraha galung a'kullemi nisangki ka parra'mi didina. Punna maengmi sangkianga, niallemi nidolla iareka nipecpe', sambarang nigaukang nu'kullea a'pakauru' pare.

Jari punna maengmi injo lessoro'na niallemi niteke' mange ri balla'a, na nisare to'mo tunjama-jamaya. Jari punna nai' ase'mo lessoroa ri balla'a, namaeng ase'mo nepararang ri alloo sinampe' nimonemi antama' ri karung.

Jari punna a'ra'ki la'berasa, angngalloi kalejaki nanierangmo a'lampa ri paberea. Punna maengmo nipabere, niallemi nitapi nanampa nipantama' ri pa'berasang. Jari punna a'ra'ki a'pallu, mange kalejaki annyanru' ri pa'berasanga, na niallemo nibissa na nihubusumo nai'. Punna tasa'mi nikarremi. Angkuami lalang atia rie'mo nisurung a'galung ka nikarremi assele'na.

Sikua'ji injo kuisse kucaritaangki. Jari iamo injo.

Punna Hattu Panjama Koko Su'rung Niuppa Nikanre Assele'na

Hamsia ana'na Cicu', Jannaya, 1986

Punna bungasaki lanjama koko nialle rolo' nibela' ruku'na. Jari punna maengmi nibela' injo ruku'a nialle mi nitunu. Mingka anre' na'kulle nitunu punna anre'pa namaeng nilengkesi numakaya lanapa'le'leri api. Jari punna maengmi nitunu injo ruku'a, na'kanre ase'mo nialle mi niokka' iareka nibukka'.

Punna maengmi niokka' iareka nibukka' injo kokoa katurungangna mami bosia nitajang. Mingka labbi riolo taua a'pa'sadia lamungang. Jari punna maengmi turung bosia a'lampamaki ri kokoa anghojai angku a'tamma'mi inni bosia iareka anre'pa. Na punna a'tamma'mo bosia, a'kullemaki anggalorang takkana ammuko. Mingka labbi riolo taua angngamme lamungang punna karahie'i na punna dannarimo ambaungi nipatitti'. Ka punna ele'pi nipatitti'i akodii ka andai ata'kakkasa. Punna nilamungi natulusu matti'-matti' to' pole erena nakodi nisohong. Punna angngammeksi lamungang kuitte tania sangga ere, nulohe buangangna nipasiammeangi; sipi', serung, sanru', pa'kaluere biasa to' pole kunyi'.

Na punna angngalorangmi taua, a'keo'maki palamung. Jari angngalorangmi taua ri dallekang, amminahang to'mii palamunga ri bokoang a'lamung. Jari punna maengmi nilamungi injo kokoa ga'rapi isse' sampulo allo na'lampa nisa'laki. Jari kunjo mae labbi sampulo allo maengna nisa'laki nialle mi. Injo punna a'baja taua biasa todo' kale-kalenna biasa to'i tabbala punna a'rera'i. Rie' kunjo mae siminggu maengna nibaja nialle mi ninangkala sa'la'na.

Kunjo mae ruang pulo allo maengna ninangkala sa'la'na aroa'mi bunganna. Kunjo to' mae siminggu roa'mi pole rejanna. Kunjo mae labbi siminggu, na punna nihibbi'-hibbi' injo bataraya niittemi assinna anggarigimi. Kunjo mae siminggu maengna niitte na nihibbi' pole a'licere kahu-kahumi intu. Jari kunjo mae siminggu pole angnganremaki batara lolo. Punna kahaji'-hajikangna injo batara loloa nikanre, a'suro a'baca doangki. Nisuro pa'baca-doangangi tau a'lampata riolo. Nanikalapikai to'mi injo bataraya. Kua'maki injo ammulai angnganrenganre batara lolo saggenna atoa.

Jari punna haji' ladda'mo injo toana bataraya nialle mi nisappe. Punna lannyappeki labbi rioloki rolo' a'baju galampang, na kunjo nilabbiang batara numaenga nisappe. Nahaji' todo' pole kunjo taua ammilei, annattaki, na ammibbi'. Punna a'patatta'ki a'keo'ki pakelong nahaji' a'turung injo mae taua a'pina'na tu'kelong, jari natunrangi to'ki pole annattaki, na ammibbi'. Jari ita'i maeng jama-jamaanga.

Jari punna maengmi nitattaki na maeng to'mo hibbikanga niteke'mi mange ri balla'a. Punna sappungmi injo tekekanga nanai' ase'mo injo bataraya ri balla'a, nialle pole nipa'na' ri paraya.

Punna la'berasaki punna maengi pannyappe anre'ja naladda' taua usa, ka injo bibbi'a rolo' nialle niberasa, jari anre' taua nammibbi'. Labbusu to'pi isse' bibbi'a, na punna la'berasaki, nampa kinai' ri paraya annaro. Punna maeng nitaro nihibbi'i, punna maeng nihibbi', nialle isse' nipecu iareka nihoso' a'batu. Na punna ta'pepumi nialle pole nihoso' a'licere. Punna maengi nihoso' a'licere, nialle niallo, na punna rangkomi nitapii. Punna maengmi nitapi lampami nigiling anjari berasami. Jari punna anjari berasami, nialle pole nitapi nahaji' a'lulu ase' sissi'na na nampa nipa'na' ri pa'berassang.

Jari punna la'palluki haji' nitappaki. Punna a'ra'ki a'pallu annyanru' kalejaki battu ri pa'berasanga. Nibissami na nipallumo nai'. Na punna tasa'mo nikanremi assele'na kokonta na bukunta. Nakuamo rie'mo kusurung ka kukanremi karesoangku.

Kua'ji injo saggenna, ka iaji injo kuisse' kucaritaangki.

A'kalapika iareka Kalapika

Ilyas, Kalimporo, 1991

Naia a'kalapikaya nagaukangi tau rioloa, bohe-bohena taua iangase'. Mingka kunni-kunnina rieki to'ja tau a'kalapika, mingka anre'mo nasanna' lohe pada tau rioloa. Apa saba'na narie' nikua a'kalapika? Situru' nunapaua tau toaya, rie' pammadang tana, rie' maraengangnaya pole, nuanre' niitsei ri taua, nitoana iareka nisare kanre, kanre-kanreang ri pammantangang numaenga napa'tantu injo tau tappa'a.

Anterea pammantangang nisare iareka nipallabbiangi kalapika?

1) Koko nilamungia batara punna bungasa nikanre batara lolona.

Injo batara lolona nipallu batui, nilappa'-lappa'i, ri maraengangnaya pole. A'gere'ki jangang sikura nikulle iareka rie'ta situru' ri a'ra'ta, nampa injo janganga nilaharai nipasilau' bura' loka buku iareka puso loka. Punna tasa' ngase'mo a'patalamaki nampa nisuro baca doang ri gurua. Maengi a'baca doang gurua angnganre ngase'maki. Nampami niatoro pa'kalapikaya, angngallemaki raung beru iareka poti raung nimonei batara pallu, lappa'-lappa', lahaba ta'sikiddiji ta'se'rea pammoneang iareka poti raung, nampa nierang nilabbiang appa' ri kacucuna kokoa, ri tangngana se're, ri buhunga nuambania kunjo ri kokoa, appa' ri kacucuna balla'a, ri benteng tangngaya ri assunga pole.

2) Ri galunga, punna maengmaki a'katto bungasa'na nikanre pare berua, pada to'ji ri kokoa. Punna pangngempang, punna maengi nijakkala juku'na nitunumi nusukku' lompoa, nampa nilabbiang ri raunga nipasiurang kanre sangka', ta'sikaju juku', nampa nierang nilabbiang pada to'ji ri kokoa. Mingka injo pa'kalapika nunilabbianga punna ganna'mi kapang tallu mani', maengna nilabbiang nakanremi injo tau angngeranga, maraengangna pole pammantangang nubiasaya nisare kalapika. Atappa'i pole injo taua sitangnga angkua punna anre' nikalapikaii anre' nalohe allena iareka assele'na kokoa, galunga, pangngempanga, maraengangnaya pole. Ka naare'i naallei bede' pammadang tana iareka jala'ma angngallei allena nunijamaya.

A'pakua'mi injo natappa' taua sitangnga ante'i pakua narie' nikua kalapika.

Pa'jagaang Pa'buntingang ri Kajang.

Ilyas, Pebruari 1986, Kalimoro.

iBaddo ana' buru'nena puang Hamid nanaha-nahai lanapa'bunting. Umuru'na iBaddo antama'mi ruang pulo lima taung. Tamma'mi a'sikola ri IKIP ruang taunga anjari to'mi guru ri SMP ri Bonto-Bahari. Ganna'mi patang taung anjari guru ri SMP nai' to'mi anjari pagabe negeri. Rie'mo se're hattu a'cidong-cidong puang Hamid rua sikalabini ri maengnamo angnganre bangngi a'bica'-bicarami lohe narapi' nabicara. Rapi'namo hattunna nikatto iareka nisangki parennna. Narapi' to'mi nabicara ana' buru'nena iBaddo nasaba' mallingmi ana' buru'ne.

Nakuamo babinenna iSalang mange ri buru'nenna: "E, puangna Baddo, inni kuitte julu ana'a napananroimaki battala nasaba' ana' buru'nemi. Rie'mi ambani tallung pulo taung umuru'na, anjari guru to'mi pole, rie' to'mo gajina maka napa'katohoang."

Nakuamo babinenna buru'nenna: "Ikaudi aringku, nasaba' rie' maengmi limang allo na nikatto iareka nisangki parea. Punna maengmi nikatto areka nisangki a'kullemaki a'naha-naha ampa'bojaangi inai maka lanipa'samaturuki."

Nakuamo ajangna: "Kunni-kunni sisalami riolo punna lanipa'bojaang bahine ana' buru'nea. Riolo, inai nangai tau toana, iamintu naturuki, mingka inni hattua iamo samara ia to'ji angngai bahine numakaya lanabuntingi."

"Jari punna pakuntui kuta'nangmi pale' riolo ana'nu. Kuddeka rie'mo nasekko-sekko ati iareka numaengmi into'mo sijanji lasibuntingi."

"Annaba batenu aringku."

Parennna maeng ase'mi nikatto iareka nisangki. Rie' ruang pulo tong assele'na ammantang. Ri hattunna pakansi rie'mi Baddo amminro mange ri balla'na. Ganna'i ruang bangngi pada cidong-cidongmi sidalle'-dalleki.

Malling-mallingmi a'bica'-bicara kuta'nangmi anrongna angku: "E, ana', kunni-kunnina nupananroia kusa'ring battala inakke tau toanu nasaba' ana' buru'nemako na anre'pa kupa'battang tauko iareka kupa'buntingko. Lakuta'nanga ri kau, ana', rie'mo nusa'ring cinnanu abunting iareka a'battang tau?"

Malling-malling a'pihalimi Baddo angku: "Lompo Bahokaraeng, lompoanggangpa rannungku nasaba' rie' pa'kuta'nangta apakua' injo. Rie'ma into'mi ri atingku, mingka mallama siri'a ampaungki iareka ampansulu'i."

"Haji'mi intu pale' punna rie'mo paunnu pakua' injo. Mingka lakuta'nangko pole, inakke lampajojjokangko iareka ampangngaiangko, iareka ikau lampajojjokanga kud'deka rie' nungai iareka rie'mi into'mo maeng nuurang sijanji lasibuntingi."

A'pihalimi Baddo angku: "Kipammopporanga sitoje'-toje'na igitte kedde' lampangngaianga mingka rie'mo sipangngajarangku ri sikolaku maeng kusekko'-sekko' ati na numakaja kusa'ring, tu battu ri Balan Nipa, kamanakangna bede' kapalana SMA ri Sinjai. Punna anre'ka saba' larie'ji mae kunre ri balla'a muko."

Tette salapanga mukoangna rie' toje'mi injo bahinea iareka iNorma sipangngajarangna a'dongko oto sedang, niruppaimi ri Baddo siurang ri anrongna dallekang balla'na. Asirurungangmo nai' balla'a na massing a'cidong-cidong a'bica'-bicara ri kadera tubattua. Na injo iNorma haji'-haji' minto'i, tanja'ha iareka kana-kanaangi situru' bungkeang babana. Sibangngiji a'bangngi na'tarrusu a'lampa ri balla'na ri Balan Nipa. Naia la'lampanamo iNorma nakeo'i anrongna iBaddo: "Mae to'ki ri balla'ku a'rurungki ana'ta iBaddo."

"Io, ana', punna anre'ka amlongi embarapi."

"Ie', kutajangki intu." Nai'mi ri oto ladongkokia iNorma riolo a'cidong.

Naia lantena mae iNorma ri balla'na ri Balan Nipa rannu ngase'mi tau ri bone balla'na, pasiampikangna, ka kunjo to'pa bija-bijanna nubahinea rie' ngase' mange ri balla'na iNorma ka mallingi nampanna isse' amminro, rie'i annang bulang. Napauang to'mi iNorma anrongna angku: "Assengka a'bangngi sibangngi ri balla'na urang sipangngajarangku ri Kajang. Kukeo' to' injo urangku siurang anrongna mae kunni ri balla'a embara."

Nakuamo anrongna iNorma: "Jari larie'ji mae ri balla'a embara?"

Napihalimo iNorma. "Ie', punna anre'kaja molongi."

Na iamo ri narapi'na pasijanjiangna rie' toje'mi Baddo siurang anrongna a'dongko oto ri tette' sampulona. Naungmi iNorma rua tallu siurang anruppaii tubattuna narungangmi nai' ri balla'na iNorma naia ammari-mari passonamo tubattuna natoanami. Ilalang atinna iSalang anrongna iBaddo napujii ampe-ampena injo iNorma sibatu balla'. Sibangngi to'ji a'bangngi naminromo iSalang siurang iBaddo. Naia lantenamo ri balla'na ammari-mari passonamo a'kuta'nangmi buru'nenna angku: "E anrongna Baddo, angngura intu mae lampa-lampana?"

Nakuamo babinenna iSalang: "Haji'-haji'ji. A'bojamako inai maka lanusuro mange a'duta."

iPuang Ahamat siurang iLamBaso' nasuro a'lampa a'duta ri Balan Nipa. Naia lantenamo na napau nuna'kattaya: "Apaji nitarimamo dutana Tiwi pamanakangna bahinea iareka Norma."

Napasso ... nitrukimi. Nabicara memangmi apa-apa nibiasaya nibicara punna lapa'buntingki kamuami balanjana siurang ri maraengangnaya nubiasaya nibicara labbi riolo. Mingka napa'samaturuknia pa'samaturukangna: "Anre'ja nipa'latta'-latta'—ujung kajuji. Se're juga sitangnga sunrang mamii na pa'pa'nikkana ipantara." Kajariangna pa'buntingangna napa'... to'mi iamintu ri sampulo alloan kunni-kunni ri

tanggala sampulo lima inni bulanga. Lamangepi a'nikka na nipa'ni' todo' doi' balanjana. Massing napa'sadiami apa-apa nulapakea punna narapi'mo hattu napa'samaturukia.

Situru' ngase'i paunna dutaya ri hattunamo amminro battu a'duta. Pada a'cidong-cidong ngase'mi bija pammanakangna. Nakua iBaddo: "Kaumo to'pa tau toana rua sikalabini."

Nakuta'nangmi tau toaya angkuaya: "Ante' intu pakua mae lampa-lampamu? Nasaba' maengmi nupau hattu kajariangna."

Nakuamo dutaya: "Anre'ja napada kunre mae ri Kajang batena tau a'pa'bunting ri Sinjai iareka ri Balan Nipa. Nasaba' kunre mae ri Kajang balanjana rolo nibicara, sikura balanja lanipanai"? Apa ilalang ri balanjaya? Apa to'mi ri pantara? Nasaba' biasaya rie' nikua pasissing ri pantarangnaya balanjaya. Rie' todo' nikua baku puli, kanreangna, tedong, era sompo-sikali, kanre, ada', pallaha tuka', siurang pangngera ri maraengaya pole. Mingka pasibicarangku ilalang ri Balan Nipa dutana bahinea anre'ja nipalatta'-latta'i. Iami intu ujung kajuji. Nasaba' iamo biasa napa'samaturuki iareka biasa nagaukang taua ilalang ri Balan Nipa. Jari iami injo sumpae' kupauangki angkuaya, se're juga sitangnga sunrang mamii napa'pa'nikka ipantarang."

Nakuamo iPuang Hamid ammannna iBaddo siuranggang tau rie' a'sidong-sidong: "Ballo toje' intu batena taua a'pa'bunting kunjo mange ri Balan Nipa. Ia to' injo haji' nigaukang kunre mae ri Kajang."

Naia massing nalangngere'namo sumpae' apa napau dutaya, massing a'paruru ngase'mi amminro mange ri balla'na, na massing napa'sadia numakaya nalapatujuang mange ri kamanakangna iareka ri sompo-sikalinna tau asompo-sikalia punna rapi'mo hattunna.

Naiamo rapi'namo hattu pangaukangna iareka pa'buntingangna nipasidongmi ada'na, napasidongmi *petiganna* [P3] kamua to'pa pammarinta caddia erangangna kapala dusun. Apaji na massing a'paruru ngase'mo tau la'lampaya angngurang bunting. Ri amminronamo niroko' ngase' balanjana, sunrangna siuranggang pa'kakkasa nunapakea labunting ri Balan Nipa. A, sikua'mi injo rolo lampa-lampanna pa'buntinganga ri Kajang kurapi' kubica'-bicara. Ribokopi isse' na nampa nisambungi na nipau batena ante' pakua punna pa'buntingi taua riolo ri anre'napa na nipake ada' nukunni-kunnia punna lapa'buntingi taua.

Pa'deppo' ri tau Bunting

Ilyas, Kalimporo, 1991

Narapi'namo hattu napasijanjianga duta buru'nea na duta bahinea allonna sanneng, tette' tallu ri ta'lesangna alloa rie'mi bunting buru'nea lamange a'nikka ri balla'na bunting bahinea. Tallu oto nadongkoki siparurangang. Roa' ri otoa ka angngerangi ganrang silabuang na'tunrung tallu tuntung annorang. Annimporong ngase'mi ri otona buntinga. Bunting buru'nea siurang bali buntingna rua, anrong buntingna siampi' ngase'mi nipalampa paboddongang niemba-emba siparurangang buntinga.

Lantei buntinga ri tuka'a, rie'mo bahine toa-toa sikiddi angngerang patakko nisekko' nupute naung ri tuka'a anruppai bunting buru'nea, nampa nasuro bunting buru'nea a'patantang ri patakko nirenreng nai' ri tuka'a. Rie' todo' tau irate ammenteng angngerang berasa nampa nakehoru buntinga nampa nakeo' nai' ri balla'a angku: "Nai'ko mae, ana', kusareko galung sideppo'."

Maengna naposu sapatunna buntinga tulusumi antama' ri balla'a nai' a'cidong ri koia iareka ri ranjanga iareka ri pantasaya a'dalle' mange ri boko balla'a. Bunting bahinea ilalangi ri bili'a cidong irate ri ranjanga iareka ri koia a'dalle' ansulu'. Punna maeng ngase'mo nipa'silolongang numaenga nipa'sitappukiang padaya pallaha bili', pa'pa'nikka, maraengangnaya pole, nai'mi katte'a iareka imanga ampa'nikkai buntinga.

Maengi a'nikka nipaentengmi bunting buru'nea ri anrong buntinga, laantama' ri bili'a a'rurungang anrong buntingna na bali buntingna. Narapi'i timuangna bili'na bunting bahinea a'barisallangmi anrong bunting buru'nea nanampa nalagu-lagu kelong pa'pantama'na ri bili'a. Battui antama' nipa'cidongmi bunting buru'nea ri ampi'na bunting bahinea nanampa nipa'sikambiang nasaba' massing lima kanangna ngase' nipa'rappaangi anrong limanna doi' pute ri alla'na. Maengi injo ansulu'mi buntinga a'rurung ngase', a'rurung mange cidong rioloangna pammarentana nurie'a cidong siurang sara'a nampa jubatang.

Nakuamo imanga ri buntinga rua-rua: "Kunni-kunni kau rua pakahaji'i langngere'na iareka pina'na'na inni pangngajara'ku iareka pa'deppo'ku. Kunni-kunni kau rua maengmako napoto' sara' nasabbii pammarenta iareka a'kalabinimako, nasekko'mako atorang pa'kalabiniang anre'mi napada ri hattunnu ana' buru'ne iareka tulolo ikau rua. Ikau buru'nea sarei pa'pakarannu-rannu babinennu, katuhoi, papakeii, punna rie' lanugaukang iareka lanulampai sipiadaiko rolo' situru'pako nampa nugaukang. Jako pakamassei nyahana, pa'risii batang kalenna, jako parenta deppokii, deppo'aji intu nituddu'pi nahaji', jako parenta bilasangii, bilasangaji intu nipeppe'pi, nitoengpi nampa haji' iareka lohe erena. Lohepi pole maraengang atorang iareka pa'pangngajara anre'pa kupauangko. Ikau bahinea sare to'i pa'pakarannu-rannu buru'nennu ri atinna siurang batang kalenna. Punna rie' lanalampai pakahaji'i nyahanu nanupinahang nutoa' punna lannimporong. Punna amminromi ruppaii ri timuangna sarei uri-uri, jako a'paui kareba kodi iareka jamma'-jamma'ki. Punna rie' lanulampai napalalopako nunampa lampa, jako hokoi punna ammeneko, parakai kanrena siurang pakeangna. Ikau rua pa'pada-pada ngase'i bijannu pimbali-bali, bija lanri kalennu iareka bija pa'tappangengnu."

Pa'buntingang hattu kunni-kunni

Ilyas, Kalimporo, 1987

Parukku' buru'nenna iMariama ammantang ri Ganta' Kajang. Ia rua tau Kajang ngase' tuhusengna. IParukku' jama-jamaangna pakoko, Mariama pabalu'-balu' juku'. Ruaji ana'na nammarimo mana'. Ile kampongji napake nammari mana'. Ka rajjing kalea nasa'ring punna tulusu mana'i, anre' nahaji' a'balu'-balu' punna mana'loloi. Anre' todo' nalohe doi'na maka lanaongkosiangi ana'na.

Ana' toana buru'ne niare'i Rahman, arinna Rahman bahine niare'i Parida. IRahman antamma'mi a'sikola ri IKIP patang taunga jurusang bicara Anggarisi, iParida tamma' to'mi ri IKIP tallung taunga jurusang IPS. IRahman angngajarami ri SMA ri Bonto Tiro, iParida nampami angngajara sitaung anjamana kakanna ri SMP Balannipa Sinjai. Ganna'namo tallung taung iRahman angngajara iParida ganna' to'mi ruang taung angngajara.

Nanaha-nahami ana' toana a'ra'mi napa'bojaang bahine iRahman sompo sikalinna to'ji nungngajaraya ri SMP Gunturu iSyamsiah arengna. Nakuta'nangmi iRahman angkua: "A'ra'ma inni kusa'ring ampambatang tauko, injo bahinea sompo sikalinna to'ji iSyamsiah nungngajaraya ri SMP Gunturu."

Malling-mallingnamo a'pihalimi iRahman na nakua: "Anre' kupekka intu ri pangnga'rakangta."

"Haji'mi pale', ana'."

A'lampami anrongna iRahman ri balla'na russana'na, bahinenna iareka anrongna iSyamsiah a'bica'-bicara riolo angkua: "A'ra' kusa'ring ampatappai kamanakangnu iRahman ri kamanakangku iSyamsiah punna anrekapa ampa'suroii."

Nakuamo russana'na: "Kukuta'nang ngase'i rolo purinanna kuddeka rie'mo natangga'."

Nakua pole russana'na: "Tajangmi embara kumange ri kau ampuangko punna anrekapa maeng natangga'."

Narapi'i janjinna mangemi ri balla'na russana'na na napauang angkua: "Anre'pa labbi riolo natangga'."

Maeng to'mi napauang ngase' purinanna iSyamsiah: "A'ra'i bede' tau toana iRahman lamae ansissingi kamanakangnu iSyamsiah. Jari sikuraya narie' tau nasuroa lamae a'sissing?"

Nakuamo anrongna iRahman: "Punna anreka saba' tajangmi ri limaya allonna sanneng, na kubica'-bicara rolo' pammanakeng."

Maengnamo se're se're napa'samaturukimi a'palante pau iareka a'sissing. Narapi'i allo pa'sijanjiangna a'lampami siurang lima a'rurung. Ri balla'na iSyamsiah rie' ngase' to'mi purinanna bija ambani-banina antajangi tau lamangea a'sissing. Naia lantenamo malling-mallingnamo a'cidong-cidong a'kuta'nangmi tau la'tarimaya bicara. "Rie' kapang kikunju'-kunjungi intu mae ka nampanta rie' atabbala a'rurung."

"Rie' lompo hajja'ku a'ra' lakupalante ri gitte ngase'. Injo iRahman a'suro palantei sallang ri gitte ngase'. A'minasai lakipari balla', a'minasai ri Syamsiah napa'kalepu kalenna tallasa sikatallasang mate sikamateang."

"Punna pakuntui a'kattata, rannu ase'maki intu allangngerei nasaba' rie' jako intu mae anrampe-rampe taua ri baji'a."

"Kutarami intu a'kattata."

"Nasambungimi pole suroa nasaba' kitarami sissingku, a'ra' memangma kusa'ring a'bicara erang nulakisuro eranga."

Nakuamo tau tarimaya suro: "Haji' to'ji intu, na anre'mo taua nangngalle hattu la'bicara poleang."

"La'kuta'nanga apai buangangna lakuerang ta'sikura todo' ta'sibuangang?"

"Kilangngere ngase'i tau rie'a. Nomoro se're balanja se're juta, rua tedong bantu' le'leng, pangka' se're sikaju, maka tallu baku' puli, maka appa' era sompo sikali patang pulo sabbu, pallaha tuka' tallung pulo sabbu, pa'sissing jarang sikaju, lima suku silicere suku-suku bulaeng, cincing bulaeng pa'sekko' pa'tanra' ruang pappa', pappa' nikka taha ruanna, pallaha bili' sampulo sabbu, maraengangna ilalangi ri balanjaya."

Nakua: "Injo nukupaua, arami kibicarai pole. Siratangmi injo kusa'ring ka nakke inni tampe bahine tampe buru'ne to'a."

Malling-mallingi nakuamo suroa: "Jarimi intu. Mingka haji'i punna niukirii katappukanga inni namassing annekeng taua pimbali-bali."

Maengi naukiri massing a'saremi bate lima iareka annekeng. Kajariangna bulang sabangpi, ruang bulangpi kunni-kunni.

Maengnamo nitoana massing amminromi suroa tulusu mange ri balla'na Parukku' na napauangmi katappukangna bicara naeranga siurang kajariangna. Ammukoangna ri ele'na rie'mo oto ammannyang rioloang balla'na Parukku'. Rie' bahinea tallu a'rurung buru'ne sitau annimporong ri otoa tulusu nai' ri balla'na iParukku'. A'barisallangmi na nibali barisallangna, nampa nikeo' antama' a'cidong ri kaderaya. Mangemi Parukku' siurang ajangna andallekangi tau battuna, massing a'jubatangmi na napau arengna kampongna.

Nakuamo Parukku': "Tau battuki pale' ri Balangnipa, nakke rie' todo' ana'ku bahine iParida arengna, angngajara ri SMP Balangnipa. Anre' kiisse' injo?"

Nakuamo tau battuna: "Baa, kuisse'mi intu ka maengi mae ri balla'ku, sipangngajarangi ana'ku iAhmad arengna."

Maengnamo nitoana ere bambang a'kuta'nangmi injo tau battua angku: "Inni kariekangku rie' a'ra' lakupa'kuta'nangang ri gitte."

"Apa injo?"

"Anre'pa injo tau maeng kiurang sitanggakang ana'ta injo iParida? Punna anre'pa a'ra'a kusa'ring a'palante sallo' pau ri gitte. Injo ana' kamanakangku iAhmad sipangngajarang to'ji ana'ta iParida."

"Kitajang-tajangmi rolo' rua tallung allo na kukuta'nang rolo purinanna, na kukuta'nang to'i pole Parida punna a'ra'ji."

Maengi a'lampami amminro ri Balangnipa. Narapi'i patang allo rie'mo tau nasuro tau toana iAhmad a'lampa a'sissing. Nasuro to' pole natappuki memang erangna. Lante mange lohemti tau nabuntuli. Malling-mallingi a'cidong a'kuta'nangmi a'kattana narie' tabbala a'rurung-rurung.

Napaumi a'kattana siurang a'ra' to'i pole natappuki memang erangna. Nakuamo pabicaraya ri bahinean: "Kutarimami intu sissingta naia erangna anre'ja na'bicara taua, iami injo pa'sitappukangna erangna ana' buru'nena kierang. Innimo kibaca sikura pa'sitappukangku. Kunre ri sura' ia to'mo injo kierang."

Maengi nabaca nakuamo: "Anre'ja kusa'ring kupasisala punna iaji injo."

"Mingka rie' lakuera."

"Apa injo?"

"Injo baku' pulia anre' naisse'i taua ri kampongku nikuaya baku' puli. Ma'ringji punna doi'mo? Injo pole tedonga kuera to'i doi'mo nasaba' punna rie' tedong kuerang mae kuddeka anre' kitarimai naerangangna pole kunre mae."

"Haji' to'ji baku' pulia doi'mo limang pulo sabbu, nakkepa ansuro pa'bajuangki ri tau maccaya. Tedonga doi'mo ruang bilangang limang pulo sabbu, nakkepa ansuro pammalliangki numakaya kutarima. Jari doi' iangase' se're juta patang bilangang rupia."

"Jarimi, kutarimami intu."

"Kajariangna bulang sabangpi, kupa'padaangji kakanna. Kajariangna lanipanai'pi jari la'panai'ki na kila'panaung," nakua injo tau rie'a a'cidong-cidong. A'bajumi sura' katappukang namassing a'sare bate lima, jaripi nampa a'panai' doi'.

Rie'mo tau angku: "Anre' nama'ring taua pa'bunting rua siana' sikali nipa'pada-padaang."

Mingka lohe tau a'mia' angku: "Anre'ja nakke kupa'lingangi nu'pakua intua."

Narapi'i bulang sabang a'parurumi massing napa'saniasami nunapanai'a siurang nunapakea. Narapi'namo allo kajariangna sanna' roa'na pa'jagaang pa'buntingangna ana'ha iParukku' rua sikali a'panai' na'panaung.

A'pakua'mi injo bica'-bicaranna punna a'pa'buntingi taua kunre mae ri Kajang kunni-kunni. Mingka lohemti anre' napada batena taua riolo, batena kunni-kunni. Ta'pela'mi nuanre'a nasanna' situru' hattua kunni-kunni.

A'baju Balla'

Ilyas, Kalimporo, 1987

Tallung taungmi maengna bunting iBaddu mange ri Bombong. Rie' to'mo ana'na sitau buru'-buru'ne. Nampami sitaung maengna bunting nanaha-nahamo a'ra' a'balla' kale-kale. Sinungka'na maeng bunting ri balla'na to'ji matoangna ammantang. Jama-jamaangna iBaddu anre' todo' ruanna anjamaya tana, luara galungna siurang kokonna. Sinungka'na maeng bunting iBaddu sanna' jarina tinanangna, nakua taua sipana'-panaikangi bahinenna. Ruang taungmi napa'se'-se're doi'na punna maengi nabalu'assele tinanangna.

Se're allo na'cidong rua sikalabini rioloangna matoangna nampa napauang angku: "A'ra'ma inni kusa'ring punna kituru'ja a'baju balla' manna caddi-caddija."

Nakua matoangna: "Injo inakke anre' todo' kuturu'ko mingka anre' todo' nakupiranggaiko. Iaji injo na kupauangko punna a'bajuki balla', tallupi singkaddo'-kaddoro: se're, kaddoropi doi'a, rua, kaddoropi kanrea, tallu, kaddoropi buku."

A'pihalimi Baddu nakua: "Anre'ja kusa'ring nalohe pareha lakupakea lakuhalli. Lakuhajua benteng loheji lakupilei ri borong kajungku sangnging na'nasa, pareha labbu siurang pareha leppa' rie' to'ja kajungku, bajung kaso bajung hulusu rie' to'ja. Tau anjamayaji injo lanipa'gunai."

Narapi'namo allo nangaia nasuro tabbangmi bajung bentengna. Rie' patang pulo pokon'na bajung benteng nasuro tabbang, bajung pareha labbuna iareka pareha leppa'na nasuro jama ngase'mi. Maengnamo nijama kajunna nulanapakea ganna'mi bentengna siurang pareha maraengangna. Balla' patang latta' lanapaenteng nitamping pimbali bentengna tallu pulo pappa'na, pareha labbu iratena, pallangga buhungangna sipappa', pallepe ajung-ajung ruang pappa', panjakkala padongko' ruang pappa', pannoddo' ulu benteng patang pappa', padongko' limang pappa', pareha labbu irahaya, karatang annang pappa', pannyuluru limang pappa', balo'-balo' hulusu patang pulo appa' pappa'na, balo'-baloo' kaso ruang pulo pappa'na, pareha bajung lego-legona siurang tuka'na, balla' pa'palluangna rie' to'mo. Nalaling ngase'mi iangase' kaju pareha balla'na mange ri pammantangang nunapa'baungia anre' nasanna' lere ri balla'na matoangna.

A'keo'mi tukang anjamaangi balla'na nasitappuki memang gunanna iangase', maeng nitimba' lajara maeng nirapa' papang dapara'na, gunanna tukanga tallung bilangang sabbu, ilalangmi tuka'na lego-legona, pa'palluangna, ata'na ata' raung kaluku loheji. Rinringna patang sulapa' a'tammu te're'ji rolo nahajuangi. Rie' patang bilangang pauru ata' nahalli, ta'ruang bilangang limang pulo sipaaru.

Narapi'i allo nangaia anjamami tukangna lima siurang. Bentengna rolo' najama, nampa pareha leppa'na, nampami nisobboldo iareka nipa' bentengna. Maeng ngase'namo nasulurumi nampa nahaung. Rie' todo' oragina balla'na. Iami injo oragia bungasa ansobboldoi iareka ampa'i benteng tangngana, nampami tukanga annyobbolo benteng maraenganga. Oragia todo' ampatabaii saba'-saba' bungasa'na nihaung iareka nipaenteng, barrisi'na benteng tangngaya.

Rie'ji sihulang anjama tukangna niata'mi, napatabami timba' lajara'na narapa'mi dapara'na, napatabami tuka'na. Lohemi tau ri hattunna angngata'. Buru'nea angngata'i lohe todo' pole maraeng najama, bahinea lohe todo' rie' angngerang-ngerang. Rie' berasa naerang, rie' angngerang dumpi, rie' todo' angngerang kanre tasa' siurang kanreanggang iareka utang. A'suro a'baca doangi rolo' ri balla'na matoangna iBaddu, ri parurumi nipatimporing rua sikalabini nakalahing ana'na, lanai'mi ri balla' beruna. Battu mange ri balla' beruna nipaiti'mi pintallung ri balla'na sikalabini nirenreng ri oragina. IBaddu a'roili pammoneang care-care iareka bece' pangkulu napa'roili, iBasse' a'sohong pa'berasang. Nirenrengmi nai' ri balla'na tulusu mange ri ampi'na benteng tangngaya a'cidong nampami a'suro a'baca doang pole. Nampami angnganre ngase' tau battua. Napacidongmi oragina, tukangna massing napadalleki kukusu nidedde', nidallekang iBaddu sikalabini.

Maeng ngase'i angnganre taua, ajubatangmi iBaddu sikalabini bungasai ri oragina nampa iangase' ri limaya tukangna. Nampami nipatarimaiang pa'gunana tallung bilangang sabbu rupia. Nakuamo oragina: "Rie'mo nusurung a'kareso sikalabini, a'cidongmako ri balla' berunu salama'ko."

Nakua todo' pole tukangna: "Inakke siparurangang anjamangko balla'nu bungasa'na sanggenna maeng, anre' todo' kusa'ring narie' maka lakukamasseeang ri nyaha ri kau ngase'. Rupa'na labbumako ampammantangii balla'nu nasareko dalle' siurang kagassingang Alla-taala."

Pakua'mi injo batena taua kunre mae punna a'bajuki balla' kaju.

Pangngissengang nikuaya Sinrahung

puang Ilyas, Kalimporo, 1986

Rie' lakubica'-bicaraki passala'na nikuaya pangngissengang. Nomoro se're iamintu nikuaya sinrahung. Napakei tau maccaya padayami riolo. Ia nikuaya sinrahung nabacai iareka napatabai sara'-sara'na, se'rea tau punna langgaukangi gau'-gau' ri sesena nikuaya napakea taua punna ammakei sinrahung. Iamintu punna rie' se'rea tau a'ra' nipanraki ri paranna tau, nitajangi ri annoranga iareka nihaja injo taua ri balinna iareka ri pammarentaya anre' na'kulle niitte manna siitte, manna sipammentengang anre' niitte injo taua. A'kulle to'i napake punna a'ra'i a'gau' kodi ri maraengannaya injo, ibara'na a'lukka'. Mingka anre' na'kulle ganna' pinruang sitaung, ta'sikaliji sitaung a'kulle anjari iareka nagaukangi pangngissengang kamunjoa.

Ri maka ruana iamintu pangngissengang nikuaya salaang. Salaanga a'kulie ambajiki ri se'rea tau, mingka a'kulle to'i nakodii se'rea tau. Iamintu nikuaya salaang nipa'tepui iareka nigaukangi sara'-sara'na punna lannimporki a'lampai anu ambani iareka anu lere onjongpa isse' ia punna rie' kasekekang. Manna a'lampa taua lere iareka ambani anre' na kisiitte balaya ri tangngana annorang sanggenna taua amminro. Iami injo kahajikangna. Anre' kakodiang niitte iareka antora'i taua punna nipakei injo nikuaya salaang. Mingka kakodiangna rie' todo'; anre' na ki'kulle siitte bija-bijanta numakaya tau antulungi ri tangngana annoranga, anre' todo' ki'kulle angnguppa kanre-kanreang ri annoranga punna pa'reki. Pada se'ree kajariang na kupau.

Se'ree hattu taung sisabbu salapang bilangangna annang pulo se'ree nakula'paruru naung ri Ujung Pandang, ka matei ajangna sikalingku ri Ujung Pandang ri Jalang Lure nomoro ruang pulo lima. Jari a'dakkama naung ri Bulukumba, ri Bulukumbapa kunampa a'dongko' oto lompo palurang kaju, papang. Kulle kapang tette' salapang ri bangngia lantema ri Sunggu Minasa, nijakkalami injo otoa nasaba' labbi lurangna. Injo mange tau para'-parangku tau amminahang ri otoa naung ase'mi angnganre ri pabalu' kanrea. Inakke naung to'ma anre' nakke tahaku, labbusui bede' nakua pabalu' kanrea. A'boja gadde maraeng tala rie'. Jari a'bojama oto nulakupake a'tarrusu naung ri Ujung Pandang, anre' apapa oto. Jari a'dakka sanggenna lante ri Ujung Pandang ri Jalang Lure nomoro ruang pulo lima. Tallung bangngia a'bangngi ri Ujung Pandang mangema a'tajang oto, mingka injo hattua angngallei taua *karcis* nampa kulle a'dongko' oto. Tallung alloo sitampe-tampe mange a'tajang anre' na kungnguppa *karcisa*. Maka pa'tangnga allonapa kunampa a'tajang oto maraeng ri tangngana annoranga na kunampa a'kulle a'dongko' oto amminro nai' mae sa'ggenna Bantaeng. Ri Bantaenga a'bangngi anre'mo oto nai' mae ri Kalimporo iareka ri Kajang. Jari ammallia sapeda, kunampa sapeda nai' mae ri Bulukumba, kunjoja ri Kalamassang annyengka a'bangngi injo bangngia nasaba' malla'-malla'ma a'sapeda nai' mae ri Bulukumba, nasaba' bangngimi. Mingka anre' todo' na kusiitte nummanrakia padayami gorombolang DITI, injo hattua punna a'lampaiki rie'pa oto tantara iareka rie'pa tantara tau angngurangki, mingka inakke anre'ja. Tette' tallu ri bangngia allantea ri Bulukumba. Lantea ri Bulukumba kunjoma a'tajang sinara. Mangea ri pabalu' kanrea, anre' kanre nibalukang, mangea ri pabalu' gaddea punna anre' nakua anre'pa natasa' nakua labbusumi. Jari ele'i a'sapedama nai' mae ri BatuGaropo. Kunjo ri BatuGaropo annyengkama a'boja gadde pole lakuhalli anre' pole nibalukang. Labbusu ase'mi tu'balu'a. Annyengkaa ri balla'ha matoang purinangku ri Katangka ana'-ana' mami kuhuntulang ri balla'na, kanrena anre' to'mo. Nai'a mae ri Palampang injo tau kupa'sengkaia tala rie' kuhuntulu ri balla'na pasissengangku injo. Saggenna ri Tanete kuhoja ase'i pabalu'-balu' gadde, kuhoja ase' pabalu' kanrea anre' tau a'balu' anre' todo' tau annanro kanre-kanreang. Sanggengku lante mae ri Dassa' a'boja loka ka pa're kaleama mingka anre'mo isse' nibalukang; punna tangnga nakua anre' kubalukang, nakua labbusumi. Lanteku to'pa ri balla'ku ri Kalimporo ri tette' limaya ri karahie'na kunampa angnganre, ri bangnginaji kungnganre ri Bantaeng ri balla'na taua sikiddi to'ji pole. Apakuami injo pau-paunna iareka cari'-caritanna nikuaya sinrahung, salaang napakei tau rioloa.

Ia nikuaya salaang napakei tau rioloa su'rung kunni-kunnina ri sesena tau angngisse'a, mingka ia nikuaya sinrahung sikaliji nipake sitaung, anre' na'kulle anjari punna nipakei a'tarru'-tarrusu injo sirahunga, nasaba' punna nipakei a'tarru'-tarrusu a'kulle tau napake a'lukka'. Jari anre' nisareangi ri Alla-taala iareka ri setang numpatantangi injo jama-jamaanga. Sikuaji injo kurapi' kupau iareka kucarita. Bara' a'kulie rie' ampanabai punna rie' pale' sala, napakahaji' punna rie' kurang.

Salama'.

Kare'-karenaang nubiasaya nagaukang tuKonjo

Juni 1990, Hamoeriani ri Kaneka'

Banga'

Naia punna kare'-karena banga' paralluki a'pa'sadia sapiri siloheang. Batena nikare'-karenai punna bungasai iamintu a'pa'boddongki jori', na ilalang jori'a sapiri bonena. Jari punna massing maengmaki a'tannang, umpama ta'ruang puloa se're tau, injoka talluki siurang, jari ilalang jori'a annang pulo lidde'na sapiri. Massing annanroki ta'sidde' sapiri pangngamba'. Naia punna massing maengmaki a'tannang a'bettaengmaki a'paco', nai-nai riolo a'paco' ia ri boko ambuang. Naia punna ambuangki konjoki ri ampi'na jori' a'boddonga.

Punna massing maengmaki ambuang sidde' pangngamba' nihojami anterea lere sapirinna, iamintu kaminang riolo angngamba' (anrembasa) sapiri nurie'a ilalang jori' a'boddonga. Punna niamba' sapiri nurie'a ilalang jori' na natora' naansulu' pantarang jori' ia injo naalle. Angngambakiji sanggenna anre' natora'. Punna angngamba'ki na anre' naansulu' pantarang jori', salami urangna isse' angngamba'. A'tarrusu a'leleang sanggenna labbusu sapirira nurie'a ilalang jori'. Jari umpamana sileleang, iA ambeta (battuangna loheang naalle naia urangna), massing a'tannangki isse'.

Naia punna maengi sileleang nai-nai lohe nabeta ia to' isse' bungasa ambuang, jari anre'mo napaco' taua pada ri bungasa'na. Tarru'-tarrusumi a'pakunjo, nai-nai ita' labbusu sapirinna ia to' riolo ansulu. Jari umpama tau tallu a'karena anjarii rua mamo ka se're labbusumi sapirinna sanggenna tappusu.

Na punna kare'-karena banga' anre' na'kulle bahine, jari ana'-ana' buru'neji a'kulle angkare'-karenai. Punna a'kare'-karena banga'ki anre' na'kulle pa'larroang taua, ka biasa pi'lellengki angngerang na anre' namaeng rie' natora' manna sidde'. Sikua'ji inni kurapi' kubicara punna kare'-karena banga'.

Barrung-barrung

Punna kare'-karena barrung-barrung lapadaji punna buang-buang, ka nasaba' anre' lanipa'sadia ruanna gatta, gattaji siloheang nipa'sadia. Konjoji pasimmaraeengangna punna barrung-barrung a'tannangki gatta, ibara'na ruaki siurang na ta'limata gatta nitannang anjarii sampulo pappa'na gatta. Rie' to' pa'pau niare' gatta pa'barrung sipappa'. Jari punna bungasai nikare'-karenai sidallekiki siurang nampa a'bettaengki a'paco'. Nai-nai riolo a'paco' ia to' riolo angngerang; anre' napada punna kare'-karena maraenganga, nai-nai riolo a'paco' ia riboko ambuang.

Jari punna niharrungi injo gatta pa'barrunga mange ri gatta pa'barrungna uranga, punna sialle nialle iangase' injo gatta nunitannanga sumpae'. Batena niisse' angkua salai, punna allalloi batena niharrung injo gattaya mange ri gattanna uranga. Naia punna salai angngerang to' isse'i uranga sanggenna niuppa injo gatta numassing nitannanga. Jari a'pakua'ji injo batena nikare'-karenai punna barrung-barrung.

Bintalu'

Punna a'bintalu'i taua, pa'sadiaki tulu' iareka bura'. Jari punna a'kare'-karena bintalu'i taua talluki siurang; rua a'kantiang na se're angngerang. Batena nikare'-karenai' injo tau nu'kantianga naputarai tulu'a nampa a'lumpa' injo tau se'rea. Jari batena tummutaraya pila' malling pila' ranrang batena naputara. Na se're pa'pau ilalangna bintalu'a inni iamintu niare' a'bangngi. Naia inni pa'pau a'bangngi anre' nammutara taua riolo, mingka ammentengki ilalang ri pa'tangngaangna tau ruaya naputara injo tulu'a.

Jari punna ilalangna naputara tulu'a na nasambangki iamintu a'pa'nassa angkua salai, jari sisambei a'karena. Punna maeng ngase'mi angngerang ta'sikali rie'mo pa'lettekang batena nikare'-karenai; iamintu nibilangi batena a'lumpa' tau angngeranga (tau a'karenaya). Jari pa'pauna tau ammutaraya nituruki; punna nakua ta'sibilanggang sikali angngerang (se're tau) na anre' naganna' sibilanggang nasambangi tulu', bangkengna, salami (sidde' apengna). Sisambei a'karena.

Rie' todo' atorang punna labbi sibilanggang, ia to'ji angngerang mingka naapengi ru'rulu'na (umpama iA na iB na iC), jari A naapengi B na B naapengi C, mingka C naapengi A. Umpama iA angngareng battuangangna iB lanaapeng. Punna iB angngareng battuangangna iC lanaapeng, mingka punna iC angngareng battuangangna iA lanaapeng. Jari a'pakua' minjo batena (atorangna) punna a'kare'-karena bintalu'i taua.

Buang-buang

Punna kare'-karena buang-buang kasangkakangna gattaji; anre' napada kare'-karena numaraenga angkua rie' niare' panto'. Jari punna buang-buang anre'ja narie' nipa'rie' ruanna gatta. Punna bungasai nikare'-karenai sala se'renna a'tannang gatta sipappa'; ibara'na ruajaki siurang, nai tannang ia riboko ambuang. Jari punna buang-buang batena nikare'-karenai ia kaminang lomo (anre' angkaminang lomoi), ka nibuangnaja gattaya punna siallei injo gatta nurie'a ta'labbiang nialle ngase'i.

Na ilalangna buang-buang inni rie' pa'pau niare' *kaca mata*. Injo niare'a kaca mata punna gatta, ibara'na gatta nurie'a nusiampi'-ampi' jari punna nibuangii biasa siallei injo gattaya pa'pada kaca mata niitte.

Jari punna kaca matai anre' na'kulle nialle, mingka paralluki ambuang poleang na iapa niallei punna anre' nakaca mata (siallei) gattaya. Naia punna a'buang-buangki paralluki a'pa'hassa batasa nunipammentengia ambuang. Jari a'bajuki garisi pammentengang punna ambuangki gatta.

Pakua'ji inni atorangna punna buang-buang.

Buang-buang tembo'

Punna kare'-karena buang-buang tembo' nunipakea iamintu gatta, nampa mangeki ri ampi'na tembo'a. Jari anre'ja napada punna kare'-karena maraeng angkua lohe nipa'sadia. Punna angnguppamaki tembo' a'bettaengmaki a'paco'; nai-nai riolo a'paco' ia riboko ambuang. Se're tau sikali ambuang na patang pappa' (a'kulle to'i nibuang ta'se're-se're iareka ta'rua-rua pappa'). Na punna maeng ngase'maki ambuang nihojami angkua inai ambani gattanna ri ampi'na tembo'a iamintu paedda.

Naia punna paeddaki nipa'se'rei gatta numassing nibuanga nampa nabuang poleang injo tau paeddaya. Punna nabuangmi injo gattaya tau paeddaya nihojami pole;nu'dongko'a ri tembo'a nialle naia nuanre'a na'dongko' (nu'dabbunga) anre' nialleia iareka anre' nibetai. Jari injo sesanna tau paeddaya nampa naerang todo' nuntolaya tau paeddaya, sanggenna labbusu injo gatta nunibuanga.

Nibuangimi naung a'tarrusu. Jari labbusupi gatta nubungasaya nibuang nampa a'pakarammula isse' ambuang gatta ri tembo'a. Ilalang kare'-karena buang-buang tembo'a anre'ja pa'pau angkua sala ka nasaba' a'lebbasaki angngerang. Punna maengi angngerang uranga manna anre' nauppa nisambeiji angngerang ka pakua' to' isse'i atorangna punna kare'-karena buang-buang tembo'.

Ceme

Punna kare'-karena ceme pa'kakkasa nunipa'sadiaya iamintu domeng siurang gatta. Batena nikare'-karenai punna bungasai iamintu rie' se're niare' *pumpaha* (pungkaha). Injo pungkahaya ia a'keo' tau a'ceme, ia to' a'goco' domeng. Massing a'tannang riolo gatta ri dallekangna, sikura-sikura a'ra' natannang. Pumpahaya ambageii anggotana ta'ruang lahara se're tau, na kalena ruang lahara todo'.

Punna anjari pumpaha taua nulohepa gattanna ka nasaba' iangase' andahui gatta punna nibetai bilangna batunna (bilangna domengna). Ibara'na appa' anggota; A lima bilangna, B tuju bilangna, C salapang bilangna, D sidde' bilangna. Naia inni pungkahaya nahoja riolo bilangna domengna. Inai-nai raha bilangna (iareka pada) battu ri pungkahaya, niallei gattanna ri pungkahaya; inai rate bilangna na pungkahaya nibannyarai ri pungkahaya.

Punna sampulo bilangna domengna niare' hutai ka nasaba' salapangji bilang kaminang tinggi, punna ganna'i sampulo padaji punna nolo'. Jari punna inni sumpae' susungangna nasare ngase'i anggotana ka nasaba' hutai pumpahaya. Na inni sumpae' iC ka salapang bilangna jari nidahui pinruang battu ri tannanga, naia numaraenganga sikura natannang sikua' to'ji nisareangi.

Jari sitoje'-toje'ha punna kare'-karena ceme kaminang gampang, ka nasaba' anre' narie' njama maraeng punna nibageimaki domeng ri pumpahaya a'tarrusuji nitimba' nanibilang. Jari punna naisse'mi bilangna pumpahaya nakuta'nang ngase'maki angkua: "Sikura ngase' bilangnu intu mae?" Jari punna rie' nakala bilangna anggotana tarrusuji naalle, punna nikalai a'dahui.

Ia nubungasaya anjari pungkaha a'kulle nisambeiang punna rie' se're anggotana loheang gattanna na ia. Ia a'kulle anjari pungkaha. Jari pakua'ji inni batena nikare'-karenai punna kare'-karena ceme.

Cokki'

Punna a'cokki'ki paralluki a'pa'sadia ruang pappa' kaju-kaju, ka injo kaju-kaju nunipakea ruang buanggang, se're nubodo (iamintu niare' ana' cokki'), na se're nulabbu (iamintu niare' anrong). Mingka injo kaju-kajua talia kaju-kaju terasa ka bakaya natora' na pa'risi. Jari injo kaju-kaju nunipakea iamintu palapa kaluku lohe nihaju, jari mannaki natora' tala sanna'i pa'risi.

Jari bunga'-bungasa'na nikare'-karenai iamintu a'bajuki kalibpong boddong na lantangna kulle kapang tuju senti, a'boddong caddi ri dallekang na riboko a'boddong lompo-lompo. Batena taua a'cokki' punna bungasai na ibara'na kale-kaleang, injo nubungasaya a'paco' ia riolo angngerang; anre' napada punna kare'-karena maraenganga angkua nai-nai riolo a'paco' ia riboko angngerang.

Jari injo nunibetaya a'paco' ammentengmi konjo ri laukangna kalibonga; ibara'na iA na iB a'cokki', nibettai iA a'paco' anjarii iB riolo angngerang. iA kalau' ri laukangna kalibonga antaraii ana' cokki'na iB; punna natimangi iA ana' cokki'na iB, iareka manna anre' natimangi, narembasami kalibonga iA. Jari punna allantemi ana' cokki'na iB nasuka'mi iB, na nahoja-hoja iA. Punna nakua iA angkua *liboi* (anre' naganna' suka' anrong cokki'), salami. Na punna ganna'i sianrong cokki' napa'tarrusui atorang cokki'na iamintu natempai pinruang nampa kua' injo sanggenna nidende. Tau angngerang angngalle anrong cokki'na, napatempa ri ana'

cokki'na pinruang. Antere'-antere' ta'labbiang ana' cokki'na kua' to'ji injo nidende tau angngerang sanggenna allante ri kalibbonga. Nampa anggerang poleang pada bungasa'na.

Cokki'a ruang buangangi; rie' nikua cokki' siapengang, na rie' to' nikua cokki' sidendeang. Jari punna sidendeang iaminni rate atorangna, mingka punna siapengang punna natempami pinruang ana' cokki'na nasuka'i isse' ia, jari sikura-sikura suka'na sikua' to' injo apeng.

Dabuang

Punna kare'-karena dabuang padaji punna kare'-karena dutu', ka nasaba' bahangna nunipakea iamintu batubatuji na anre' maraeng. Konjoji pasimmaraengangna ka punna dutu' anre' nibuang batu-batu na boko lima antaraii. Punna dabuang nibuang iangase' batu-batua nai' riboko limaya, nampa injo nuanre' na'dabbung nitimang amminro. Jari punna dabuang rie' pa'pau niare' *rangka'*. Injo nikua rangka' iamintu punna nibuang na nitarai boko lima na tallu lidde' ammantang riboko limaya niare' rangka'. Punna rangka'i, salai.

Jari batena nikare'-karenai atorangna pada punna palanta', ia namaeng se'renta, ruanta, tallunta, appa'ta, limata, sanggenna labbusu batu-batu nunikare'-karenaia. Jari simpada ngase' punna palanta'. Punna geo' natoleang lima salai, iareka anjappu'ki na anre' niuppa nialle, sala to'i. Punna narapi'i iangase' injo batu-batu nunikare'-karenaia niare' sidde' apeng.

Jari punna kare'-karena dabuang anre' na'kulle sambarang hattu, rie'pa tau maeng kamateang; jari pa'danggangpa nampa a'kulle taua a'kare'-karena.

Domeng Lima-lima

Naia punna kare'-karena domeng lima-lima parallu to'ki a'pa'sadia domeng na gatta, jari padaji punna ceme. Pasimmaraengangna iamintu punna ceme rie' niare' pumpaha, naia punna domeng lima-lima anre'ja ia. Ia punna ceme anre'ja natantu angkuwa sikunjo tau, mingka punna domeng lima-lima appa'paki nampa anjari kare'-karenaanga. Angngura na nikua domeng lima-lima? Ka nasaba' lima laharu domeng ta'se're tau.

Punna bungasai nikare'-karenai na domeng lima-lima massing a'tannangki gatta; ibara'na ta'sampuloa se're tau, injoka appa'ki anjarii patang pulo pappa'na gatta. Jari punna bungasai, sala se'rennaji nuappa'a a'goco' domeng, nampa massing nabage ta'lima se're tau. Ia nubungasaya a'kulle panaung domeng, iamintu nurie'a dobolo annangna, iareka punna anre' dobolo annang, dobolo lima, Aru'ru'-ru'rului batena tau a'panaung, na nihaja matana domeng angkuwa sikura iraha. Punna anre'i ri matana domeng nunakantianga, nakua "anre'a nakke."

Naia punna a'karenami ilalang pa'domengang rie' pa'pau niare' *konci*. Jari injo niare' koncii iamintu punna ambuangki domeng na anre' laniru'ruliangi matana domeng nurie'a iraha. Na anre' ngase' injo nuappa'a, iami injo niare' konci. Injo punna koncii nai-nai katappusang ambuang iami injo angngonci arengna. Jari injo nungngoncia angngallei gattaya injo sumpae'.

Naia punna katappusang a'domeng taua na gitte kaminang riolo labbusu domengta, gittemi intu domeng. Jari punna domengki, gitte todo' angngallei injo gatta nunitannanga sumpae'. Jari punna panggocokang anre'ja na'tantu angkuwa ia numbetaya, a'lebbasajaki nai-nai a'ra' anggoco'.

Na pakua'ji inni punna domeng lima-lima na gatta. Mingka punna domeng lima-lima na nikua sibahiang, batena taua anggerang (a'domeng) padaji punna domeng lima-lima. Se're punna sibahiang, nai-nai riolo labbusu domengna iamintu ambahii (angngapengi) taua (urangna). Jari punna domeng lima-lima anre'ja narie' kabengongang.

Dutu'

Kare'-karena dutu'a bahangna iamintu sangga batuji, jari anre' narie' golo' pada punna palanta'. Jari punna dutu' nitalasaji batu-batua nampa punna maengi nisuro jojjo'i ri uranga angkuwa: "Anterea lakupaamba'." Naia punna nijojjokangmi sidde' batu-batu pangngamba' jari anre' na'kulle sala erang taua.

Jari punna kare'-karena dutu' padaji punna palanta', anre' to' na'kulle ageo' injo batu-batu numaraengangna. Se'reji punna dutu' sikura-sikura nageo' injo batu-batu panggamba'a ia to' injo nialle. Mingka punna nikandatte'i batu-batua paralluki a'kaati-ati ka bakaya limata natoleang injo numaraenganga. Naia punna angngamba'i taua paralluki a'kaati-ati todo' ka bakaya niamba' na anre' natora'. Jari punna anre' natora', salami, iareka nitoleangi (natoleang lima nageo') na talia batu-batu panggamba'.

Sampang salai natalasa isse' uranga nampa nijojjokang injo kandatte'. Jari punna a'dutu'ki nai-nai labbusu kanrena ia niapeng. Punna dutu' lasimangeangji punna banga', nai-nai ita' labbusu kanrena ia to' niapeng. Naia dutu'a punna nikare'-karenaii nikandatte'i na anrong lima angkandatte'i. Jari punna angngandatte'ki na anre' natora' ia to' a'pa'nassa angkuwa: "Salai." Jari sikua'ji inni kurapi' kubicara punna kare'-karena dutu'.

Paiti' Twirling

Punna kare'-karena paiti' paralluki a'pa'sadia kaju-kaju bajung panto' na gatta. Batena nikare'-karena punna bungasai a'paentengki riolo panto' rua sikambani. Naia panto'a ruang buangangi, rie' bodo na rie' to'i nulabbua. Punna sadiami injo panto'a nampamaki a'pakarammula a'kare'-karena.

Bungasa'na a'bettaengki a'paco', inai-nai riolo a'paco' ia riboko ambuang. Jari punna nibuangi gattaya inai-nai ambani gattanna ri panto'a iamintu paedda, na inai angkambanii injo nupaeddya ia injo antolai. Jari ibara'ha gattanna iA paedda, iA todo' riolo a'paiti'.

Jari injo gattanta na gattanna uranga nipa'se'rei sikaliji nipaiti' ri panto' tinggia; sikura-sikura antama' ri panto' caddia iangase' to' injo nialle. Mingka injo sesanna napaiti' to' injo nuntolayai, sanggenna labbusu injo gatta nunibuanga. Nampa punna labbusui injo gatta sumpae'a, a'pakarammula isse'. Umpama ta'tallua na kiappa' siurang anjarii sampulo anrua (12).

Jari punna a'paiti'ki a'lohe-loheangki gatta ka nasaba' punna kare'-karena paiti' anre' tau macca. Jari battu ri kasabbarangaji, ka punna anre' kisabbara a'kullei nitappu'-tappu' ngase' gattaya. Biasai pinruangmaki a'paiti' na tingang rie' antama' ri panto' caddia.

Galacang

Kasangkakangna punna galacang iamintu batu-batu na pa'galacanggang. Mingka injo batu a'kulle to'ji nisambei numaraengangnaya assalang haji'i nikantiang pa'pada batu-batu. Injo punna pa'galacanganga kulle to'i kaju nihaju mingka punna anre', kullesi ri tanaya (tana nikali'-kalibpong) na lohena kalibpong, iamintu tuju kalibpong sihali na rua kalibpong pannanroang kanre. Jari punna galacang ruang buangangi: 1) galacang sitembakang; 2) galacang sidapanggang.

1) Naia punna galacang sitembakang punna bungasai angngerangjaki a'tarrusu na bonena injo kalibpongta ta'appa' batu-batu. Jari punna nikare'-karenaii nijappu'i sikalibpongta, nampa nipabone ta'sidde' sikalibpong ru'ru'-ru'rulu. Punna labbusui injo nuniallea sumpae', antere'-antere'i katappusang ia injo isse' nialle batuna. Mingka punna angnguppaki kalibpong nuanre' monena na labbusumo injo batu nunikantianga narie' ri tujuna injo kalibpong nunakatappusia batu-batu, niare' nitemba'i uranga. Jari nialle batu-batuna uranga nunitemba'a na nibone ri pannanroang kanrea. Punna maengi annemba' napatarrusu naerang.

Ilalang kare'-karena galacang inni rie' to' pa'pau niare' *docu*. Iamintu punna angngerangki na labbusumo batu-batua nunikantianga na kalibpong anre' bonena na kalibpong uranga anre' todo'. Punna docu taua uranga to' isse' angngerang. Jari ia inni pa'pau docu, galacang sitembakang ta'pake to', galacang sidapanggang ta'pake to'ji. Jari inni pa'pau docu memang pa'pau punna galacang. A'lebba'-lebbasaki angngerang. Na inni galacang sitembakanga punna labbusui kanreta (batunta) iami inni niare' sidde' apeng. Jari punna galacang sitembakang a'lohe-loheangki kanre (batu).

2) Galacang sidapanggang punna bungasai nikare'-karenai padaji punna galacang sitembakang. Punna angnguppaki kalibpong nuanre' monena na labbusu injo batu nunikantianga, docuki; jari uranga to' isse' angngerang. Injo nikuaya *dapang* iamintu punna maengki angngerang narie' nutallung lidde'a bonena injo kalibpongna na anre' na'kulle nierang. Punna se're kalibpong na tallu lidde' bonena, se're to'ji dapang arengna. Punna angnguppaki kalibpong na tallung lidde' bonena na tappusu nikantianga, niare' angngerang. Nialle injo patang lidde' batua na a'tarrusuki angngerang.

Jari punna galacang sidapanggang anre' angkua labbusu'na (tappusu'na), sileleang na kiniapeng. Punna sidapanggang sanggenna labbusu kanrena balia (manna sidde' kanrena anre'mo), nampa nipa'kullingi; nipake kanrea nipamone ri kalibpong. Inai-nai labbi kanrena ia riolo angngerang. Jari konjoji pasimmaraengangna ka punna galacang sidapanggang lohe pa'pau, naia punna galacang sitembakang se'reji pa'pau, iamintu niare' docu. Naia punna galacang sidapanggang tantumi rie'na niare' docu. Na kuare' punna inni nibaca a'kulle kapang rie'mo pangngamu'na ri galacanga, jari manna tala labbu *teorina* kulle kapang nipahang.

Ie-ie

Naia punna ie-ie a'pa'sadia to'jaki gatta le'leng; naia labbuna gattaya a'kulle nipasisambung sanggenna appa' metere labbuna. Jari punna a'kare'-karena ie-iei taua talluki siurang na a'kulle to'i rua-ruangeng, padaji punna bintalu'. Konjoji pasimmaraengangna, ka punna bintalu' a'lumpa'taja; naia ie-iea atorangna a'pakarammulaki injo nukantianga napasintinggi gattaya nakulantu'na, na injo nungngeranga nalumpaki gattaya. Kulle natoleang, mingka anre' na'kulle nasambang. A'tarrusu sintinggi aja', barambang, toli, ulu, silama' rateangna ulua, ruang lama' rateangna ulua, maengi injo sihalepa. Jari punna tappusu susungangna inni rate a'pakarammulaki irate isse' nampa a'lampa naung. Na punna tappusu to'i pa'lampa-naungna ta'pinra isse' batena nikare'-karenai, iamintu punna allantei ri kulantu' konjomaki mulai amminra batena nikare'-karenai. Lohena geo'na punna lantemi ri kulantu'; pakarammulaki ammutara sikali ri bangkenga nampa niparunrungrung bangkeng sihalianga, maengi injo nihuusui.

Atorang ia inni bungasa punna allantemi ri kulantu'a na nibilang pillimang. Maka ruana nipakalu'i isse' pinruang todo', na padaji batena ri maka se're. Maka tallu iamintu niputara kaleji pinlimang nampa nipainro

ta'sikali-kali. Jari ia inni maka tallua kamingang lomo geo'na. Na nu'pa'nassaya todo' angkua salai iamintu punna nasambangi tulu' (gatta) bangkenga iareka lalangna injo punna ammutaraki na sala putara; ia to' injo a'pa'nassa angkua salai. Jari punna ie-ie lohe geo'na lampakasalai, anre' napada punna bintalu' angkua se're lampakasalai, iamintu nasambangi bangkenga tulu'. Na atorangna punna nitappusii se're leleang anggerang na anre' sala-sala taua niapeng to'i injo urangta. Batena niapeng padaji punna bintalu' umpama tallujaki siurang A na B na C, A naapengi iB, B naapengi iC, C naapengi iA. Pada punna bintalu'. Jari a'pakua'ji inni batena nikare'-karenai ie-iea.

Kaddaro

Bahang nunipakea iamintu sai' sipolong-polong. Nampa inni kare'-karena kaddaroa buru'neji a'kulle angkare'-karenai; bahinea anre' na'kulle ka nasaba' kodii niitte bahinea a'kare'-karena kaddaro. Jari batena nikare'-karenai iamintu a'bajuki riolo jori' pallabbianggang sai', nampa sai' nitannang ta'rua se're tau ri jori'a.

Rie' to' pa'pau niare' *duleng* (pa'sambe), injo sai' pa'sambea nipasilabbiangi sai' nunitannanga. Jari kunjo ri jori'a ta'sibatu duleng se're tau, na ta'sibatu todo' tannang. Jari ambuangki sai' sibatu ri ampi'na tannanga; inainai lere sai'na iamintu paedda. Injo nupaeddaya angngamba' (ammiring) riolo sai'na nunabuanga sumpae'. Batena nipingam iamintu nipingam ribokoi ka nasaba' anre' na'kulle niitte injo tannangna uranga.

A'kaddaroa rie' nikua siapengang na rie' to' niare' sibetaang. Punna sibetaang iana niamba' (nipingam) sai'ta na natora'i sai' tannangna balia, niallei (nibetai). Mingka punna siapengang iana natora'i sai'na balinta nikua se're apeng (sidde' apeng). Jari punna a'kare'-karena kaddaroki na sibetaang paralluki a'pa'sadia sai' lohe, mingka punna a'kaddaroki na siapengang ruaji sai' kaminang lohe.

Na inni a'kaddaroa sintoje'-toje'na a'sai', ka nasaba' kaddaro battuangangna sai', kaddaro bicara Mangkasara naia punna Konjo sai'. Jari inni kare'-karenaanga sintoje'-toje'na kabattuangna battu ri Mangkasara. Mingka nihajui pa'pau kare'-karenaang ri tau Konjoa angkua kaddaro. Na sikua'ji inni kurapi' kubicara punna kaddaro.

Kaso'

Ia to' isse' punna kare'-karena kasoa', ia nunipa'sadiaya kaju-kajuji sipappa' na batu rua pallabbianggang kaju-kaju na ta'se'renta batu pangngamba'. Jari ibara'na kasoa' sibetaang gatta, nipayadongko'i gattaya ri kaju-kajua; ibara'na talluki siurang na a'tannangki gatta ta'limata, anjarii sampulo lima pappa'na.

Jari punna sadiami tannangna mangemaki ri ampi'na injo gatta nunitannanga a'betaengmaki a'paco', inainai riolo a'paco' ia riboko ambuang. Jari ibara'na tallu taua a'karena A, B, C; iA riolo anggerang ka ia kaminang lere batunna. Jari narembasami injo gatta nurie'a a'dongko' ri kaju-kajua, na punna riekija ammantang (nasesa iA), narembasa to' isse'i iB, na punna riekija nasesa iB, narembasa to' isse'i iC.

Sanggenna labbusu tannangna, nampa nipa'kulangi amminro tannang poleangki. Na inai-nai lohe nauppa sumpae' ia riolo ambuang. Na inni nukaminang sikiddia nauppa ia kaminang riboko ambuang, mingka punna ia lere batunna ia riolo anrembasaa.

Mingka ibara'na kasoa' sidendeang anre' na'kulle cempang taua (tallu, lima, tuju na rateangna pole punna nuanre' balinna). Kasoa' siapengang anre'ja napada punna kasoa' sidendeang, iareka kasoa' sibetaang gatta. Naia kasoa' sidendeanga punna narembasai kaju-kajua na natora' parallui a'dende injo balia. A'parembasaki batu pangngamba', ante'-ante' turung kua' injo nidende sanggenna lante mae ri pa'kasokang. Na pada to'ji punna kasoa' siapengang; punna kasoa' siapengang iana natora'i injo kaju-kajua niare' sidde' apengna.

Jari punna kasoa' lohe buangangna mingka batena nikare'-karenai lasimpadaji. Jari punna nikua kasoa' naisse' ngase'ji taua batena nikare'-karenai. Sikua'ji inni punna kasoa'.

Konta'-konta'

Nunipa'sadiaya iamintu panto' todo' na gatta. Jari padaji punna paiti' iareka patte'-patte'. Pasimmaraeng-angna punna konta'-konta' panto'na se'reji, nampa nubodoji, anre' napada punna paiti' iareka patte'-patte'. Jari punna konta'-konta' na bungasa nikare'-karenai anre'ja na kikonjo ambuang ri ampi'na panto'a punna bungasai. Mingka parallui nisare pa'bambaeng angkua kunniki ambuang gattaya na anre' na'kulle allallo bangkenga manna se're senti.

Jari panto' nunipa'sadiaya a'kulle annang senti ka nasaba' lanita'tallangi naung ri tanaya ga'ra rua senti. Jari punna sadiami panto' siurang pa'baeng-baeng pambuanganga (garisi), a'betaengmaki a'paco'; inai-nai riolo a'paco' ia riboko ambuang. Ibara'na ruajaki siurang a'kare'-karena konta'-konta', inai nibetta a'paco' ia riolo ambuang. Punna massing maengmi ambuang inai-nai ambani gattanna ri ampi'na panto'a iamintu paedda. Jari injo nupaeddaya na pa'se'rei injo gatta nunibuanga sumpae'; ibara' ta'sampuloa na kiruaja siurang, anjarii ruang pulo. Naia injo gatta ruang puloa nibuang ngase'ri tau paeddaya, nampa punna maengi nabuang injo tau paeddaya nipa'jojjokangmi ri urangna gatta nukaminang lerea battu ri panto'a. Punna maengmi nijojjokang gatta nulanaamba'a (nulanapatte'a) nipa'se'remi injo gatta nusampuloa salapang ka ruang pulo iangase'.

Jari batena nipatte' injo gatta pa'patte'a pa'jojjo'ta ampatte'i nampa injo lima sihaliangta antanra'i, nilappasangpi ri pa'jojjo'a nampa nilappasang todo' ri lima nuntanra'ai. Punna napatte'i pa'jojjo' naantama' (ta'unrung) ri panto'a naalle ngase'i injo gatta ruang puloa. Punna anre' naantama' nabuang poleangi injo gatta ruang puloa urangna. Inai-nai ampatte'i antama' ia to'ji angngalle iangase' gattaya. Nampa ambuang poleang pada ri bungasa'na. Inai ambettai gattaya, ia riolo ambuang. Punna konta'-konta' a'pakua'ji inni batena nikare'-karenai.

Lojo'-lojo'

Punna bungasai nikare'-karenai inni lojo'-lojo'a anre'ja bahang nipa'sadia, tauji. Jari umpama tujuki sipa'lojo'-lojokang, se're niare' pungkaha, naia pungkahaya ia to' injo a'pa'se're tau. Nampa punna rie'mo tau a'se're mange ngase'mi ammenteng ri ampi'na injo pungkahaya. Jari injo pungkahaya napaka'rangmi pala' limanna nampa napatojjo' ngase' urangna pa'jojjo' limanna ri pala' limanna injo pungkahaya. Naia punna a'jojjo' ngase'mi limanna injo ana'-ana'a a'kelongmi pungkahaya. Na apa nakua kelongna; iamintu: "Lojo'-lojo', lojo' pakanre tai pasobbi' gallang-gallang enteng ri ...!"

Jari ilalangna a'kelong injo pungkahaya paralluki a'kaati-atи ka nasaba' punna narapi'mi kelongna pungkahaya angkua "enteng ri ..." anjakkalam se're lima (pa'jojjo'). Inai-nai niuppa limanna iamintu a'bombo' nampa punna a'bombo'mi a'lampa ngase'maki a'sobbu. Inai sinampe' bungasa nihuntulu (niitte) ia to' isse' injo a'bombo' sanggenna nataba ngase' gilirang a'bombo'.

Jari ilalangna punna a'sobbuki rie' pa'pau niare' *pole*. Injo pa'pau pole iamintu punna a'bombo'mi taua, na a'lampa a'boja, injoka amminro ri pa'bombokanga iami injo niare' pole. Jari punna rie' se're urang apole, iaiji injo nusumpae'a a'bombo'. Naia inni lojo'-lojo' numaka se're.

Punna lojo'-lojo' numaka ruaya iamintu a'pa'sadiaki bahang, na bahang nunipa'sadiaya iamintu raung loka niki'nye'-ki'nye' na lompona ki'nye'na raung kulle kapang se're jari. Nampa umpama limaki siurang, limang pappa' to'i raung. Mingka injo raung limaya se're rie' poto'na, na inai-nai angnguppai raung nurie'a poto'na injo sumpae' iamintu bungasa a'bombo'. Jari padaji sumpae' numaka se'rea batena. Iaji injo pasimmaraenggangna ka rie' raung, na kelongna padaji. Na sikua'ji inni kurapi' kupau.

Palanta'

Punna kare'-karena palanta' paralluki a'pa'sadia golo' caddi na batu-batu. Jari batena nikare'-karenai punna bungasai anre'ja na ki'paco', battu ri kaa'rakangtajia. Jari punna palanta' sala se'rennaji riolo angngerang.

Punna bungasai, nibuangji golo'a, nampa ia to'ji injo lima numbuanga golo', ia to' anrappung batu-batu, iato' annimang golo' nunabuanga sumpae'. Jari inni lima sihaliangga tukang annarima batu-batu nunarappunga lima se'reanga sumpae'. Ibara'na karua batu-batu, nitalasai riolo batu-batua. Jari punna angngerangmaki anre' na'kulle nitoleang injo batu-batu numaraenganga punna nijappu'i ta'sidde'. Iana nitoleang (geo') injo batu-batu numaraenga, salai. Punna anre' nitimangi golo'a, sala to'i; punna dabbungi batu-batu nunijappu'a sala to'. Jari punna a'palanta'i taua paralluki a'kaati-atи ka nasaba' nulohe la'panjari sala.

Atorangna punna bungasai angngerang taua sidde'ta, ruanta, tallunta, appa'ta, limata, annangta, tujuta, karuanta (iangase') injo batu nunieranga. Jari sikura-sikura batu-batu iangase' to' injo nierang nipalanta'. Na se're pa'pisangkana punna sidde'ta, anre' na ki'kulle a'cekkele (angngalle rua iareka angngalle tallu na sikali a'lanta' golo'a).

Naia punna narapi'mi ase'ta (iangase' injo batu-batua), na tappusu anre' salata niare' sidde' apeng. Jari punna angngerangki na kikaati-atи biasa limapi apeng nampa sala, jari ia to'pa (salapi) nanggerang injo urang. Jari punna kare'-karena palanta' pakua'ji inni batena nikare'-karenai.

Patte'-patte'

Naia punna kare'-karena patte'-patte' paralluki a'pa'sadia kaju-kaju bajung panto', jari padaji punna paiti'. Iaji pasimmaraenggangna ka kaju-kajua punna patte'-patte' sinlabbu-labbui panto'na, naia punna paiti' anre' na sinlabbu-labbu panto'na. Jari punna patte'-patte' panto' to'ji napa'sadia siurang gatta, lasimangeangji punna paiti'.

Atorangna punna kare'-karena patte'-patte': maka se're a'bajuki panto', a'paentengki panto' ruang pappa' sintinggi-tinggi silama' alla'na. Punna mentengi injo panto'a nampa niambang gatta sipappa'. Punna maengi, massing a'tannangmaki gatta, ibara'na ta'limaya se're tau na kiappa' siurang anjarii ruang pulo pappa'na gatta lanipatte'. Injo gatta nunitannanga konjo nilabbiang rateangna gatta pangngambang panto'a.

Jari punna sadiami tannanga mangemaki ri ampi'na panto'a na kikonjo a'betaeng a'paco'; inai-nai riolo a'paco' ia riboko ambuang. Na numaka ruaya a'paco' ia to' maka tallu ambuang, gaci'na, jari numaka tallua a'paco' ia to' maka rua ambuang. Jari inai-nai katappusang (riboko) a'paco' ia sukku' riolo ambuang. Pakua'ji injo atorangna punna a'pakarammulaki a'kare'-karena patte'-patte'.

Punna maengmi ambuang gatta pa'patte' sipappa' ngase' tau nuappa'a siurang, nihojami inai-nai lere gattanna; iamintu kaminang riolo ammatte'. Iana rie' nasesa nampa to'mi napatte' injo nuntolayai sumpae' nubungasaya. Pakua'ji injo na tarru'-tarrusu batena nikare'-karenai patte'-patte'a.

Jari ibara'na nubungasayaji ammatte' na a'dappo' ngase' gattaya a'tannangki isse' sanggenna labbusu ngase' gattanna uranga. Jari batena nikare'-karenai nipatte'ji injo gatta nurie'a a'dongko' ri panto' nuniambuanga gatta, punna nipatte'i na a'dabbungi ia to' injo nialle. Jari sesanna nuanre'a na'dabbung ia to' injo napatte' tolata injo sumpae' nulerea gatta pa'patte'na sanggenna pakua' injo tarrusu.

Na lerena taua ammatte' anre'ja narie' batasa'na battu ri batenaji taua ambuang. Naia a'patte'-patte'a rie' to' pa'pau *koddo*. Injo niare'a koddo iamintu gitte kaminang riboko ambuang na konjo ri ampi'na panto'a nibuang. Mingka batena taua angngerang, maeng ngase'pi injo taua nulerea pa'patte'na nampa gitte todo' nukoddoa ammatte'. Jari inni gitte nukoddoa rie'pa dalle'ta nampa rie' todo' nipatte', ka nasaba' gitte kaminang riboko ammatte'. Mingka inni pa'pau koddo ita'i nipau. Ibara'na ammenteng ngase'maki ri ampi'na panto'a tappa' angkuamaki "koddoa nakke," jari naisse'mi uranga angkua rie' urang akoddo. Se're todo' pa'pisangkana, anre' na'kulle koddo rua tau. Jari punna rie'mo se're urang akoddo anre'mo na'kulle a'mia' numaraenga angkua: "nakke koddo".

A'pakua'mi inni atorangna punna kare'-karena patte'-patte'.

Pincong

Punna kare'-karena pincong bahang nunipa'sadiaya sangga pincongji (pue sempe iareka batu-batu leppa'). Lohena taua angkare'-karenaiii rua iareka tallu tau. Inai-nai riolo a'paco' iamintu kaminang riolo anggerang. Inni raha gambarangna pinconga:

Ri nomoro se're bungasa nibuang pinconga. Punna nibuangi pinconga na anre' natangnga kota' iareka natora'i garisia, salai. Punna a'dakkamaki angngerang na nilisa' garisia, sala to'i.

Punna maengi nibuang ri kota'a nilingkaimi injo kota'a nampa a'dakkajaki, sihali bangkeng se're kota'. Punna nirapi'i kota' karua, nipa'ruai bangkenga, jari anre' napada kota' maraenga. Nampa a'dakka amminro. Punna narapi'mi kota' pallabbiangang pinconga, niallemi pincong nampa nilingkai kota'a.

Punna salama'ki ri nomoro se're nipa'tarrusui ri nomoro rua, sanggenna tappusu inni kota'-kota'a. Naia ri nomoro karua kua' injo anre'ja nibuangii. Jari punna nitappusii nibuangi ngase' kota'a pincong na anre'ja nasala, nibuangii isse' panaungna battu nomoro appa' sanggenna to' tappusu. Mingka batena nierang anre'ja nilisa' ngase'i kota'a. Ibara'na punna nibuangi kota' nomoro appa', konjojaki ri kota' maka tallu sanggenna a'lisa', nampa nialle pinconga na kimminro.

Jari punna tappusumi nibuangi kota'-kota'na ta'pinrami atorangna batena nikare'-karena, iamintu a'pakarammulaki isse', kipanai' pincong ri baho bangkeng. A'dosensengmaki ammiti' sanggenna tappusu to' kota'-kota'a. Nampa punna ansulu'maki ri kota'a nitimangi injo pinconga nurie'a ri bangkeng. Punna anre' nitimangi, salai. Mingka punna nitimangja a'tarrusu naerang ri baho limanna, nampa ri uluna. Amminroki isse' ri baho lima mingka nipageo'i limaya (nipaketo), jari iami inni niare' paketo.

Na iangase' inni atorang maka ruaya punna nierangi ammiti' to'jaki ri kota'a a'lisa'. Mingka punna paketo na tappusumaki a'lisa' ri kota'a a'bokoki nampa nibuang ribokoi rateangna ulua injo pincong nurie'a ri limaya. Na punna antama'ji ri kota' maka se're antama'ji balla' (apenga), mingka punna anre' naantama', salai. Jari punna salai sisambeki angngerang alleang nataba ngase' leleang angngerang.

Se're pole atorangna punna paketo, iamintu punna nibuangi na natabaja kota' maka se're niare' balla'. Jari anre'ja nibuangii punna angngerangi uranga ka nasaba' gitte pata balla'. Punna urang angngerang, nalingkaiii injo balla'ta, mingka punna gitte angngerang paralluki a'pa'rua bangkeng konjo.

Naia niare' apeng iamintu punna nitappusii iangase' injo tujuua kota' (balla'na taua) nampami niare' se're apeng. Jari punna pincong a'lellengki angngulang. Naia batena taua a'paapengi padaji punna kare'-karena maraeng, ibara'na A naapengi B, B naapengi C, C naapengi A. A'kulle nilappasi apenga; ibara'na punna rie' apenga iB na natarrusu angngerang sanggenna nitappusi ngase' tujuua kota', nampa niare'i lappasa apengna.

Sitoje'-toje'na punna pincong lohe buangangna, mingka nurie'a ri gambaraya irate inni niare' pincong bassikoe'. Kunni-kunnina ana'-ana'a napa'rie'i isse' gambara pincong na batena to' nikare'-karenai. Jari inni iraha gambara pincong riolo numaka ruaya.

Pa'nassaangna padaji gambara pincong maka se're. Jari anre'ja narie' kabengonggang ilalang gambara maka rua inni. Na arengna niare'i kapang pincong tau ka nasaba' lasimpadai kuitte gambara tau. Na sikua'ji inni bateku nakke punna pincong.

Tendisi

Punna tendisi a'pa'sadiaki golo' (golo' gatta, golo' karung, a'kulle to'i raung kaluku nianang golo'). Jari inni tendisia anre'ja narie' atorang angkua golo' gattapa iareka golo' karungpa. Lohena taua angkare'-karenaiii iamintu rua tau, mingka iami inni kaminang sikiddi. Jari a'kulle rua-ruangeng, tallu-tallueng, appa'-appakeng sanggenna a'ra'-a'ra'taji.

Batena nikare'-karenai iamintu nitempaji golo'a. Naia punna ruajaki angkare'-karenaiii, anre' napada punna rua-ruangeng iareka rateangna. Jari punna ruajaki angkare'-karenaiii, se're annempa na se're annarai golo'. Jari punna kale-kaleang, ia namaeng annempa, numarimaki sanggenna lante ri batasaya.

Ia nuntaraiai golo'a na nauppa golo'a na narembasang tunumaria, injoka natora'i na anre'pa narapi'i batasaya, salami. Punna anre'ja nauppa golo', a'tarrusuji angngerang. Mingka punna annempaki na lere tempana a'kullesi angngalle kasampangang numari amminro na kingngerang poleang.

Naia punna rua-ruangeng, iareka appa'-appakeng ebara'ha se're annempa. Ia namaengmo annempa, numarimi. Jari injo nuntaraiai golo'a anre'ja nangngoporo ri urangna. Mingka a'tarrusuji napa'sareang ri urangna injo nunnempaya sumpae'. Jari punna annempami injo urangna numaka se'rea (numaka ruaya), numarimi amminro numaka se'rea. Naia punna anre' na'kulle amminro injo sumpae' numaka se'rea, na maeng to'mo annempa numaka ruaya, kua'mi injo na sioporomo siurang. Na kua'mi injo angngalle kasampangang numari, sala se'renna injo nuruaya siurang. Mingka punna numarii sala se'renna nuruaya na rie' natora', salami. Jari punna salami, nisambeangmi angngerang ri balinna. Inni tendisia anre'ja angkua tau toapa angkare'-karenaiii, iareka ana'-ana'pa.